

Gabinete AVP-FUTURO: Trayecto di flexibilisacion den maneho di admision pa indocumentadonan drenta mercado laboral di Aruba



Pagina 3

- **Final di september
Conseho di
Minister di Reino
lo trata concepto
di Rijkswet**

Pagina 4

- **Rigoberto Sint
Jago (PPA):
Splicacion
di e ley di
criptomoned
nobo GENIUS ACT**

Pagina 6

- **A firma
acuerdo pa
traspasa 99
cas di FCCA**

Pagina 6

Studentenan ta subi avion
atrobe pa continua nan estudio
na Hulanda



Pagina 2

Corsou: Atake di pitbull por costa doño
mas di 200mil florin



Pagina 8

Argentina:
Milei ta veto
aumento di
pensioen y
beneficio pa
discapacidad

Pagina 10



Studiantenan ta subi avion atrobe pa continua nan estudio na Hulanda

Ayera atardi dia 4 di augustus a sali e grupo di studiantenan—conoci como e beursalen—rumbo pa Hulanda pa asina continua cu nan educacion halto. Ta conoci cu tur aña e Departamento di Enseñansa Aruba (DEA) ta organisa e biahe aki, y ta brinda e studiantenan guia y sosten durante e prome dianan di e transicion importante aki.

Ayera na Aeropuerto Reina Beatrix por a mira decenas di estudiante cla ta para den rij cu nan sernan keru pa check-in pa nan vuelo. Normalmente, studiantenan cu ta bay Hulanda tin e cantidad mas grandi y pa e motibo ey semper a parti e biahe di tur estudiante durante dos dia, usualmente fin di juli y comienso di augustus.

Sinembargo, a nota riba e website di DEA cu e aña aki, e fecha di biahe ta pa un dia so. Segun informacion di DEA pa un otro medio di comunicacion, e aña aki a mira 184 estudiante biahando pa Hulanda, di cual 107 tabata t'ey presente ayera y e otro nan sea a bay caba of lo biahá riba nan mes den e proximo dianan.

Por a nota cu e aña aki tambe a mira menos estudiante biahando pa Hulanda compara cu aña pasa, unda un total 218 estudiante a biahá bay tera friu. Aunke no a logra verifica ainda e motibo exacto, e caída den estudiante por tin di haber cu e situacion dificil di vivienda na Hulanda.

Manera Bon Dia Aruba a reporta aña pasa caba, Hulanda ta mirando un deficit den vivienda cu ta sigui crece, y esaki ta laga varios estudiante di Caribe cu dificultad pa haya vivienda. E aña aki, e situacion no a mira mucho mehoracion.

Aña pasa Bon Dia Aruba a acerca un vocero di DEA, ken a enfatisa cu un di e consenhanan mas importante cu nan ta duna na e studiantenan cu kier bay studia na Hulanda ta pa inscribi trempan pa por haya un vivienda. El a indica cu desde cu e hoben cumpli 16 aña e por inscribi caba pa vivienda.

Mayoria estudiante Rubiano ta studia den region di 'randstad', y atrobe e aña aki mayoria estudiante (39) lo bay studia na Den Haag, sigui pa Eindhoven (23) y Utrecht (22).



Estudionan mas scogi entre e studiantenan e aña aki ta Finance & Control – IFMC cu 14 estudiante, HBO-ICT International Business cu 13 y Mechanical Engineering cu 6.

Na momento cu nan yega rond di merdia na Hulanda, e studiantenan lo ser ricibi pa e mentornan di e diferente stadnan.

Di biahá despues di nan yegada nan ta ser parti den grupo dependiendo di e stad unda na ta bay studia y di eynan e mentornan ta sigui compañía nan te ora nan yega nan destino final. E dianan cu ta sigui despues di nan yegada, e mentornan ta guia y asisti e hobennan pa haci diligencianan importante necesario.

Hunto cu e mentor, studiantenan tambe ta haya guia di miembronan di e Plaatselijke Opvang Commissie pa studiantenan Rubiano, conoci tambe como 'POC-leden'. Esakinan ta mayormente studiantenan cu ya tin varios aña ta bibando na Hulanda y pues por duna conseho valioso na e studiantenan nobo.

Riba e pagina di Facebook di Onderwijszaken Arubahuis, a splica cu e aña aki e POC-programma ta dura cuatro dia largo, den cual e studiantenan lo haya oportunidad pa regla inscripcion na censo, regla papelnan di lening cerca DUO, habri cuenta di banco, traha un DIGID, y conoce nan scol y e ciudad den cual nan ta bay biba.

Loke nan no mester preocupa cune mas ta e BSNnummer cu ta hopi importante pa contacto cu entre otro Departamento di Gobierno, manera seguro y salubridad. Tambe e studiantenan mester tin un BSNnummer pa por inscribi pa un camber como estudiante y pa habri un cuenta di banco pa pidi un seguro.

Den luna di maart 2024 ex-minister di Enseñansa, Endy Croes, a anuncia cu desde e aña aki studiantenan di Caribe lo ricibi nan BSNnummer prome cu nan biahá pa Hulanda.

E proceso aki ta ser coordina y regla via Dienst Uitvoering Onderwijs (DUO) cu a prepara pa amplia su servicio desde aña 2024 pa por brinda e servicio adicional aki.

Esaki ta nifica cu desde aña 2024 en adelante, e studiantenan por aplica desde Aruba pa nan BSNnummer y asina por logra biahá cu nan BSNnummer den man, cual lo facilita nan ora nan yega Hulanda.



Gabinete AVP-FUTURO a anuncia trayecto di flexibilisacion den maneho di admision pa indocumentado drenta mercado laboral

Durante un conferencia di prensa di Gobierno di Aruba, Minister di Husticia, Integracion y Transporte Publico, Arthur Dowers a anuncia un trayecto di flexibilisacion di maneho di admision na Aruba. E trayecto aki lo duna persona indocumentada na Aruba e oportunidad pa drenta mercado laboral.

Minister Dowers a splica cu manera ya ta conoci, algun siman pasa Gobierno di Aruba a tuma e decision pa suspende temporalmente loke ta conoci manera e “arbeidsmarkt-toets”. Esaki tabatin como meta pa yuda baha e presion cu tin den mercado pa loke ta trata falta di personal, pero asina mes no a logra e resultadonan cu tabata spera.

E mandatario a indica cu den ultimo añanan no tabatin un maneho optimal den e sector aki y esey a haci tambe cu a bira dificil pa por mantene e maneho. Pa e motibo aki, gobierno a tuma e decision, pa baha e presion grandi y creciente den mercado laboral, di facilita e proceso door di duna permiso na hendenan cu ya ta den e mercado laboral sin e toets.

Aworaki gobierno a yega na e siguiente fase caminda ta constata cu e presion, cual



nan a spera di baha, no a baha suficiente, y toch ta mira cu den mercado tin hopi persona indocumenta cu ta traha na e momentonan aki.

Gobierno di Aruba a tuma e decision pa flexibilisa e maneho di permiso pa cierto persona. Esta esnan cu ta trahando indocumenta, cu ta presente na e pais, cu por yega na un dunador di trabao. Y aunke na e momentonan aki e persona a keda mucho

largo na e pais, gobierno no lo bay over na nenga e permiso.

Minister Dowers a splica cu un persona cu ta na Aruba caba, cu a yega Aruba prome cu dia 1 di juli, y cu ta trahando of tin e posibilidad pa yega na un trabao, por solicita pa bin na remarca pa un permiso di trabao.

El a sigui splica cu e mesun rekisitonan cu mester cumpli cune ora cu un persona cu ta trahando ta solicita permiso normalmente, e mesun rekisitonan ey mester cumpli cune si e persona ta na Aruba caba y ta trahando caba of kier drenta e mercado laboral, pero tin un status di indocumentado na e momentonan aki.

El a agrega cu e unico diferencia cu tin ta cu den e trayecto di flexibilisacion no ta bay existi pa e persona bandona e pais, y tampoco ta bay nenga e permiso pasobra cu a keda na e pais fuera di e reglanan.

E mandatario a remarca cu e meta ta dirigi riba legalisacion di hendenan cu ta na Aruba na e momentonan aki. Pues no tin intencion pa bin cu gruponan grandi di trahadonan di afo. Ademá el a indica cu temporalmente ta bay baha e dunamento di permiso na persona cu ta di afo y ta bay enfoca pa duna permiso na e hendenan cu ta na e pais na momentonan aki, pa nan por drenta den e mercado laboral legal.

El a splica cu esaki tin como beneficio cu e hendenan ta bay cumpli cu e regla y ley nan di e pais, nan ta bay paga e primanan cu mester ser paga y contribui na e beneficionan di e pais.

“Hunto nos kier traha riba progreso di e pais aki y nos ta spera di por conta cu cooperacion di tur dunador di trabao cu mester di trahado, pa haci uso di e posibilidad cu ta ser brinda na bo na e momentonan aki,” el a enfatisa.

Minister Dowers a ratifica cu e trayecto di flexibilisacion ta conta pa cualkier persona cu ta na pais Aruba na e momentonan aki caba, y cu a drenta Aruba prome cu dia 1 di juli, por aplica pa drenta e mercado laboral legal. E trayecto aki no ta conta pa hendenan cu a caba di yega awor of cu a drenta Aruba despues di 1 di juli.

El a indica cu banda di esaki, gobierno a tuma e decision tambe pa duna e posibilidad na hendenan cu ta biba na Aruba caba, y cu na e momentonan aki pa motibo di reunificacion familiar a haya un permiso cu e prohibicion pa traha, pa kita e prohibicion pa traha. E personanan aki por solicita pa haya un permiso normal y asina drenta e mercado laboral y contribui na e desaroyo di nan famia. El a agrega cu mesun cos ta conta pa studentenan cu ta mayor di edad cu lo por drenta e mercado laboral si nan ta

traha banda di nan estudio.

E mandatario a sigui splica cu tambe nan a crea e posibilidad pa adkiri un permiso flexibel pa hendenan cu ya ta trahando y cu tin cinco permiso. Despues di e di cinco permiso, nan por solicita un permiso flexibel, cu ta un permiso cu ta dura maximo cinco aña, y cu e permiso aki e persona ta haya e libertad pa por traha cerca otro dunador di trabao of cu mas cu un dunador di trabao.

Adicionalmente el a menciona tin e posibilidad tambe di aplica pa permiso pa mas cu un aña. El a remarca cu ta spera cu e dunador di trabao ta haci uso di esaki pa nan trahadonan, cu lo haci administracion mas facil y lo baha presion riba e organizacion y ademá lo duna e trahado un siguransa mas largo.

Minister Dowers a indica cu na e momento aki e trayecto ta bay cuminsa cu tur persona cu a drenta di forma legal Aruba, pues via aeropuerto principalmente, caminda e persona ta ricibi e stempel di entrada den su paspoort.

E mandatario a informa cu fin di luna, gobierno ta bay haci e prome evaluacion y lo duna informacion riba kico a encontra den e proceso y basa riba esey lo evalua kico ta e siguiente pasonan cu mester tuma.

Pa loke ta trata DIMAS, el a splica cu a haci y ta haciendo adaptacion den sistema di operacion di DIMAS pa mehora servicio. Ademá di esaki a admiti diferente persona adicional pa brinda servicio y tin un grupo special cu ta bay atende cu e trayecto di flexibilisacion aki. Pues e trayecto regular di DIMAS ta sigui y e trayecto di flexibilisacion tin un team special cu ta bay traha riba dje y ta spera cu e dos gruponan aki por brinda suficiente servicio.

E trayecto di flexibilisacion ta tin un periodo di duracion di cuater luna pa tur persona cu no tin permiso registra. Minister Dowers a enfatisa cu no por garantisar cu tur permiso lo sali den cuater luna, pero e meta ta pa den cuater luna tur hende registra y despues di e prome evaluacion lo mira si mester haci cambianan na e trayecto of no.



Final di september Conseho di Minister di Reino lo trata concepto di Rijkswet

Durante un conferencia di prensa ayera mainta Eduard Pieters, fraccie medewerker di fraccion PPA, a trece dilanti e topico di Ley di Reino pa Supervision Financiero (Rijkswet). Pieters a remarca cu te ainda pueblo no por haya bista di kico e Rijkswet ta encera y ya ta mas cu mitar di aña a pasa bay.

Pieters a splica cu desde final di januari fraccion PPA a entrega un peticion pa gobierno bay Parlamento di Aruba y splica den un reunion publico pa duna un splicacion detaya tocante e Rijkswet, cual mester a ser yama dentro di 30 dia, pero te dia di awe, siete luna despues e reunion no a ser yama.

El a indica cu en berdad Parlamento a haya un presentacion di e ambtenaarnan tocante un concepto di e Rijkswet y eynan por a ripara cu na final di september den Conseho di Minister di Reino na Hulanda lo trata un concepto di e Rijkswet.

“Parlamento te dia di awe no a haya oportunidad pa trece esaki den pueblo. Parlamento ta esnan cu ta representa pueblo y esaki no ta sucede. E proceso aki ta un proceso caminda cu na Hulanda un grupo di ambtenaar ta bay tuma cierto decision, ta schets e ley aki y e ta bay prome na Den Haag den Conseho di Minister di Reino, despues Tweede Kamer y por ultimo e ta bin Parlamento di Aruba,” el a indica.

Pieters a recorda cu den luna di mei eigenlijk tabata e deadline, pero niun decision a ser tuma y p’esey PPA a yama e reunion na januari pa trata e ley aki y haya e sentimentonan di pueblo pa prome cu e deadline tuma decision, pero esey no sucede y awor como consecuencia di e falta di tumamento di decision Aruba ta pagando un interes di 6,9% riba e prestamo cu a haya for di Hulanda, cual Pieters a señala tambe ta cuestionable.

El a splica cu e ta bisa cu e ta cuestionable pasobra den un forma pisa, memey di un pandemia, no un incidente cu a pasa na Aruba so pero un pandemia cu a afecta henter mundo, caminda Aruba mester a fia placa pa sigui cu bida na Aruba, nan probecha y awor nan ta cobra e placa aki



banda di e 6,9% di interes.

“Awe nos ta wak tin falta di liderazgo. Pakico mi ta bisa esaki, pasobra si nos tin un liderazgo cu curashi awe nos por trece e puntonan aki y splica pueblo kico ta loke e ambtenaarnan a trece pa dilanti. Falta di liderazgo tambe pa uni e pueblo aki. Si nos wak di añanan 40 bin te aña 86, door di union cu tabatin a logra nos status aparte. P’esey tambe PPA for di inicio tabata papia di un frente nacional consistiendo di e mesun politiconan, pero tambe di e gremio comercial y gremio sindical,” el a indica.

El a splica na luna di juni fraccion di PPA a yama un reunion cu gremio comercial pa sinta cu nan y splica nan kico ta pasando, na cual gremio comercial a sali bisa cu nan no ta compronde kico ta balor agrega di parlamento pasobra parlamento e momento ey no a haya informacion tocante kico e Rijkswet ta.

“Nos ta biba den un estado di derecho nos ta biba den un democracia parlamentario y e ora bo ta haya cu nan ta cuestiona, cu tur nan rason, e derecho di existencia di parlamento, e por ta algo peligroso,” el a subraya.

Pieters a splica cu siguiendo cu e insistencia pa un frente nacional, fraccion PPA a reuni tambe cu gremio sindical y a informa gremio sindical tocante kico tabata e concepto cu lo bay bin riba mesa pa loke ta trata Rijkswet. El a sigui splica cu despues di e reunion aki un sindicato a trece dilanti cu e Rijkswet no

tin draagvlak. Esaki, el a remarca, ta un di e motibonan pakico PPA semper a boga pa informa hendenan, gremionan, tocante e Rijkswet pa asina ora cu mester cu mester tuma decision tin e draagvlak.

“Un parti importante ta autodeterminacion pasobra cu Rijkswet tin peliger di perde esaki, cual tanto a lucha p’e y esaki ta cosnan cu gremio a vocifera y p’esey nan kier ta den dialogo cu gobierno pasobra dia di mañan e ta afecta nan tambe,” el a enfatisa.

Por ultimo Pieters a subraya cu tin un sin fin di falta di tumamento di decision y p’esey fraccion PPA ta haya cu tin falta di liderazgo riba e pais aki. “Un falta di liderazgo efectivo, un falta di liderazgo caminda nos por transforma

e pueblo aki y esey ta hopi di lamenta,” el a resalta.

Pa loke ta trata e frente nacional, Pieters a sigura cu fraccion PPA no lo stop di insisti pa forma e frente nacional aki y nan ta spera cu den futuro cercano gobierno por yama tambe un dialogo nacional.

Manera ta conoci dia, 1 di mei ultimo tabata stipula como e deadline pa Gobierno di Aruba y Hulanda yega na un acuerdo riba Rijkswet financieeltoezicht (ley di Reino pa supervision financiero) y entrega e proyecto di ley aki na Parlamento di Aruba y Tweede Kamer. Despues cu no a logra cumpli cu e deadline, Secretario di Estado e tempo ey, Zsolt Szabó, a anuncia cu lo aumenta e interes cu Aruba mester paga

riba pendiente di 5,1% pa 6,9%. E prestamonan aki ta e prestamo cu Aruba a haci durante pandemia di Covid-19.

Na nivel oficial actualmente ta trahando riba e contenido di e concepto di ley di Reino. Na momento cu ambos gobierno bay di acuerdo cu e proposicion, esaki lo ser entrega pa un ronda di conseho na Aruba y un consulta na Hulanda. Despues di procesa e conseho, ta keda na Conseho di Minister di Reino pa entrega e proyecto di ley na Conseho di Estado di Reino pa conseho.

Y mientras cu den prensa local a publica cu Hulanda no ta bay sigui cu e Rijkswet, e realidad ta cu e proceso pa yega na un tipo di rijkswet ainda ta andando. Ta simplemente cu e ley mester tin consenso entre Aruba y Hulanda, algo cu e propuesta di ley anterior no tabatin, y awo mester bin cu un propuesta cu si lo conta cu sosten den Parlamento di Aruba y alabes ta algo aceptable pa Hulanda.

Loke ta keda ta pendiente ta pa mira si e proceso parlamentario lo por cuminsa e aña aki ainda. Na momento cu e Rijkswet di Aruba dreña na vigor, Hulanda lo baha e tasa di interes na un nivel di conforme mercado mas un toeslag chikito, manera ta conta caba pa Corsou y Sint Maarten cu 3,1%. Mientras tanto, Parlamento di Aruba ainda no a reuni tocante e topico aki.



Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart-Boekhoudt

Redaccion

noticia@bondia.com

Pilar Flores (hefe di redaccion)
Angenette Figuereo (closer editor)

Leo Maduro
Dilma Arends
Raisa Montilla
Oriana Geerman

Ehecutivo di Benta

Sulaika Croes
sulaika.croes@cspnv.com

Mark Gomes
mark.gomes@cspnv.com

Aviso y Arte

Sandra Loefstop

Lisa Tromp

Departamento Digital

Juan Luis Pinto

Administracion

accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Martin Boekhoudt
Francis Dirksz

Colaboracion

Associated Press
Ret Karibense
Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22
Tel: 582-7800

Email: noticia@bondia.com
aviso@bondia.com
info@bondia.com

Website: www.bondia.com
Facebook: @bondianoticia
Instagram: bondiaaruba

BON DIA ARUBA ta un corant
redacta y imprimi na Aruba y ta
obenibel di dialuna te cu diasabra.
Ningun contenido por wordo reproduci
sin permiso di editor.



Editorial

Pakico mester ley... Si no tin maneho...?

Riba diferente tereno nos por observa cu falta supervision, cu por bin di un banda so, y esey ta di gobernacion. Cualquiera di siman nos por topa tema den nos medionan di comunicacion cu ta indica problema cu finalmente tin nan solucion solamente si tin mas y mihor supervision, pero pa motibo no esclareci, esey no t'ey.

Den nos edicion di ayera por ehemplo, un articulo dedica na e fenomeno di Airbnb, o Short Term Vacation Rentals, e rama mas nobo na nos turismo, cu ta parce di bay domina riba e sectornan tradicional di hotel y timeshare. Loke ta parce un fenomeno nobo, y un problema nobo tambe, no ta asina. Hopi aña pasa caba a señala e tendencia, na otro pais y na Aruba, di e crecimiento di e sector di acomodacion turistico na escala chikito, cu ta responde mas na e gusto di e turista di fecha mas reciente. Nos a miira e desaroyo ey tuma lugar, pero realmente tabatin un maneho, si ta reconoce cu esaki ta un rama nobo na e mata di turismo, cu tin derecho di existencia? No, y e motibo pakico no, ta masha simple: nos estilo di gobernacion ta uno di a lo maximo bisa cu mester hiba un maneho pa un asunto o desaroyo dennos economia o comunidad, pero realmente haci esey? No, nos gobernantenan ta keda mas tanto pega den expresa e intencion, y nada mas. Ora cu e problema bira mas grave por existi e posibilidad cu ta declara cu 'nos ta bezig cu e cos ey', pero e resultado mas visto probablemente lo ta cu no tin nada pa mira. Pa nos no haya e critica cu e observacion aki ta ignora por lo menos parti di e realidad, ta importante pa señala cu den cierto caso ta tuma accion, y por lo menos ta desaroya legislacion nobo o ta adapta esun existente, den un intento pa contraresta e problema creciente. Den e ehemplo menciona di Airbnb no ta di awor cu ta señala cu por lo menos lo mester bin mas supervision y preferiblemente regula e sector economico aki, pasobra esey e ta mientras tanto, na un manera debido. Mester di ley nobo? Talvez, pero que hubo si nos cuminsa cu aplica e leyman existente, manera esunnan di impuesto y di control di higiena y seguridad? E problema cu nos ta mirando awor ta cu e falta di control ta crea un situacion di faborece e operacion fuera di control y supervision di autoridad, causando asina un situacion desfavorable pa esunnan, grandi y chikito, cu si ta conoci na autoridad y ta paga impuesto y ta cumpligu ley. Loke nos por mira aki ta e problema cronico di supervision gubernamental, cu ta keda cu e tradicion di cada aña bay den control rutinario cerca esunnan cu ta conoci caba, y no ta

reserva capacidad institucional operativo pa busca e parti di mercado cu no ta cumpli. Si no bin un cambio den e 'tradicionalismo' aki den e forma di opera, ta imposible pa mehora algo den gobernacion y ta keda mantene e situacion inhusto pa e empresanan cu ta opera completamente legal. Den e caso aki no ta asina dificil pa hiba control, pasobra ningun Airbnb por opera si nan no ta accesible pa cliente riba internet. No ta cuestion anto di core rond gasta gasolin di auto di gobierno, drentando den tur hanchi pa purba descubri unda tin un negoshi cu ta opera fuera di ley. Pakico no ta cambia e modelo di supervision anto? Pakico nos parlamentarionan no ta cuminsa haci pregunta na e ministronan responsable? Talvez pasobra e fenomeno economico aki a bira asina general caba, cu tur tin famia y conocir cu ta den e sector aki? Esey no ta un argumento valido pa no actua; si ta asina nos mester acerca tur problema di supervision, anto nos mester contempla e idea di aboli gran parti di gobernacion.

Otro caso cu ta den publicidad regularmente ta e problema di cacho riba caya. En berdad durante e gobierno anterior tabatin algun accion gubernamental pa cuminsa actua, sin embargo esey no tabatin tanto resultado. Loke nos no a mira despues ta un analisis pakico no tabatin resultado, pues aki loke nos pensamiento. En general bo no por spera milagro di e mero hecho cu a traha o adapta ley, si na mes momento no tin un plan di ehecucion cu por lo menos riba papel ta muestra cierto credibilidad. Y pakico no tin credibilidad? Pasobra pa cuminsa tur accion gubernamental ta costa placa, y den e caso aki tambe un bon sermon bisando e ciudadano pa por fabor no laga su cacho bay caya no tin ningun resultado, pasobra e ciudadano cu tino y sentido di responsabilidad ta cumpli caba... Simplemente no tin accion contundente pa atende e asunto cu posibilidad realistico di exito. Kico pa haci? Nos no ta sugeri cu mester bolbe na e metodo cu polis tabata mantene na fin di añanan 50, inicio di añanan 60 di siglo pasa, di tira tur cacho mata cu nan haya riba caya den marduga. Polis tabata arma cu shotgun durante nan tarea di patruyahe y hende di cierto edad por ta testigo cu no tabata haci wega. Sin embargo, mester por tin metodo riguroso pa atende e problema aki, cu mester cuminsa cu planificacion y, poniendo placa riba presupuesto pa por implementa un plan.

Pa ambos ehemplo menciona aki nos por keda bira rond sin haci nada, y cada tanto tempo 'lamenta' cu un cierto problema ta existi.

A firma acuerdo pa traspasa 99 cas di FCCA

Den cuadro di un reunion importante yama pa Prome Minister mr. Mike Eman, hunto cu Minister di Infraestructura drs. Rene Herdê y instancia relevante manera DLV, DIP y FCCA, a trata e situacion cu ya algun tempo ta afecta hopi famianan na Aruba: e falta di traspaso legal di casnan di FCCA pa nan legitimo doñonan.

Durante bishitanan den diferente bario, hopi habitante a expresa nan preocupacion directamente na Prome Minister Eman tocante un situa-

cion cu nan ta considera in-husto, segun un comunicado di gobierno. Ta trata di 99 famia cu a paga completo pa nan cas via huurkoop, pero nunca a ricibi e acta notarial cu ta duna nan derecho legal como propietario.

Na momento di haci e ultimo pago di nan huurkoop, hopi ta esnan cu a keda sorprendi cu tabatin otro obstaculonan administrativo y tecnico cu tabata impedi e traspaso final. Un di e obstaculonan principal ta cu algun di e terenonan riba cual e casnan ta construi, no tin marcacion oficial pa

determina e area exacto di cada tereno.

Segun e comunicado, pa e retonan aki, Gabinete AVP-Futuro a pone prioridad riba busca solucionnan structural, pa yega na un registracion y traspaso legal, y asina duna seguridad y paz mental na e famianan afecta. Durante e reunion, a logra un acuerdo firme cu e stakeholders presente, cu pa fin di 2025, tur 99 cas lo keda marca formalmente y traspasa na nan respectivo doño.



ARC Gloria: Embahador di Colombia riba lama

Diadomingo mainta, Prome Minister mr. Mike Eman, Minister mr. Wendrick Cicilia, Minister drs. Rene Herdê, hunto cu Consul di Colombia na Aruba Sr. Gustavo Serrano Amaya y Embahadora di Colombia na Hulanda Sra. Carolina Olarte Bácares, a presencia e yegada magistral di e Buque ARC Gloria.

Prome Minister hunto cu e capitan naval, Luis Fernando Lara Cogollo, a subi abordo y cu saludo ceremonial di cañon, prome Minister Eman a haci un inspeccion di arma di e personal. Despues, hunto cu e delegacion, a bay den e "Officer's Wardroom" den cual e capitan a duna un splicacion di nan tarea riba e buque.

ARC Gloria ta un simbolo



flotante di orguyo, tradicion y amistad di Colombia pa mundo henter. Cu su bela grandi y figura elegante, e ta un di e botonan mas admira na unda cu e yega, segun un comunicado di gobierno. Pero tras di su beyesa tin un proposito: pa train futuro oficialnan naval y pa representa Colombia riba escenario internacional.

Desde su lansamento na 1968, ARC Gloria a nabega pa mas cu 77 pais, parando den casi 200 puerto mundial. Unda cu e bay, e ta hiba un mensahe di pas, disciplina y cultura Colombiano. E tin dos rol principal: Como boto di entrenamiento, e cadetnan naval ta siña habilidadnan practico den nabegacion, trabao den grupo y liderazgo.



Como embahador maritimo di Colombia, e ta hisa e bandera nacional cu orguyo, cu ta e bandera mas grandi hisa riba un boto di bela!

Gloria ta un tall ship, cu tres mast grandi y mas cu 20 bela. Aunke e tin un motor, regularmente e ta nabega riba poder di biento, mescos cu botonan anticua di siglo pasa.

Cada aña, rond di 70 cadet hoben ta subi riba Gloria pa un biahe largo riba lama. Nan ta siña nabega, mara na waf, maneha emergencia y maneha e boto. E ta un experiencia duro, pero e ta forma caracter fuerte y ta crea recuerdonan pa bida.

E bishita aki ta un simbolo di e relacion fuerte y amistad entre Aruba y Colombia.

Rigoberto Sint Jago (PPA)

Splicacion di e ley di criptomoneda nobo GENIUS ACT

E "GENIUS Act" (Guiding and Establishing National Innovation for U.S. Stablecoins Act) ta un ley Mericano cu a ser firma pa President Donald Trump riba 18 di juli 2025. E ley aki ta regula con *stablecoins* (moneda digital cu ta liga na un balor stabiel, manera dollar Mericano) por ser emiti y usa na Merca. Aki ta sigui un splicacion simpel di e puntonan principal, skirbi pa Rigoberto Sint Jago (PPA) den un comunicado di prensa.



1. Kico e ley ta haci?
- Ta crea un marco federal pa 'stablecoins', pa asina tin reglanan cla pa un compania cu ta crea y uza nan.
- Ta sigura cu 'stablecoins' ta

sigur y confiabel pa e usuari-
onan.

2. Reglanan importante
- Reserva 1:1:
Pa cada 'stablecoin' cu ta wor-
do emiti, e compania mester

tin e mesun cantidad di placa na dollar of otro activonan di likides sigur (manera bono di estado).

- Control y regulacion:
Companianan mester laga auditornan independiente controla nan reserva pa prueba cu nan tin suficiente placa.

- Ken por emiti 'stablecoins'?
Solamente companianan aproba, manera banconan of institucionnan cu permit special, por crea 'stablecoins'. No cualkier hende por haci esaki.

- Transparencia:
Companianan mester ta abier-
to tocante con nan ta funcio-
na y con nan ta maneha e
placa di e clientenan.

3. Pakico esaki ta importante?
- E ley ta proteha consumid-
ornan pa sigura cu 'stable-
coins' no ta perde nan balor
asina facil.

- E ta duna tur compania e
confiansa pa uza 'stablecoins',
loke por stimula innovacion
den pago digital.

- E ta evita pa estadonan crea
nan propio reglanan, y asina
lo tin un standard unico na
nivel nacional.

4. Ki dia e ley ta drenta na
vigor?

- E ley a ser firma riba 18 di
juli 2025. Funcionarianan tin
180 dia (mas o menos te jan-
uari 2026) pa fiha e detayenan
di e reglanan.

Conclusion:

E "GENIUS Act" ta sigura
cu 'stablecoins' na Merca ta
sigur, confiabel y bon regula,
pa asina hende por usa nan cu
confiansa como pago of in-
version. Alabes e ta un strate-
gia pa asina e dollar Mericano
keda cu importancia interna-
cional, ya cu e ta wordo me-
nasa door di e bloke comer-
cial cu yama BRICKS.

PPA ta di opinion cu nos no
por keda atras den e desaroyo-
nan mundial pa cu criptomo-
neda, y si nos construi leynan
y crea un ambiente atractivo
pa inversionistanan, Aruba lo
por crea un pilar economico
nobo, lanta un generacion di
cripto-empresarianan y asina
yuda nos paga nos debe ex-
terno mas liher sin pone mas
presion riba pueblo!

Enfermero sospechoso den morto di Covid ta presenta keho contra psikiatranan cu a report'e

(NLTimes)—**Theodoor V., e ex-enfermero sospechoso di ta envolvi den mas o menos 20 morto na Wilhelmina Ziekenhuis na Assen, a presenta un keho disciplinario contra empleadonan di GGZ Drenthe y un psicologo di Outpatient Forensic Psychiatry Noord.**

Segun e keho, nan a viola confidencialidad profesional y “no a cumpli cu e cuido necesario ni a mantene registro apropiado,” segun abogado di e homber a conta ANP di aluna.

Aresto y suspension di caso V. a ser aresta na april 2023 despues cu e hospital a reporta e casonan na autori-



logra esey via para ventilador-nan of ignora orden di dokter y tuma decision pa duna dosis mas halto di morfina sin aprobacion.

Segun abogado di V., e sospechonan contra su cliente tabata basa solamente riba informacion di esnan den cuido di salud mental. “Si nan a cumpli cu e deber di confidencialidad, e homber no lo a keda deteni,” nan a bisa. V. ta nenga cu el a haci e declaracionnan riba cual OM a basa su sospechonan.

Mas tempran den aña, fami-anan di victimanan di coronavirus cu a fayece den Wilhelmina Ziekenhuis na Assen a presenta un procedemento segun Articulo 12, cu ta pidi corte pa forsa Ministerio Publico pa traha un proceso penal contra V.

dadnan. Ministerio Publico (OM) a sospecha cu e enfermero di Veenhuizen tabata involucra den e morto di mas o menos 20 pashent den e departamento di pulmon na Wilhelmina Ziekenhuis durante e periodo mas critico di pandemia, entre maart 2020 y mei 2022.

E caso contra V. a ser suspendi na april 2024 pa motibo di

falta di evidencia suficiente. V. a pasa seis siman deteni.

E acusacionnan di fiscal tabata basa riba un carta cu ta bisa cu e enfermero a conta varios colega cu el a “prematamente caba cu e bida di mas o menos 20 pashent cu e tabata considera terminal y sufriendo fuertemente.”

A sugeri cu e enfermero a

Gates Foundation ta compromete \$2,5 biyon pa salud di hende muher



(Reuters) — **Gates Foundation a anuncia dialuna cu nan lo aloca \$2,5 biyon te 2030 riba salud di hende muher, unda fundador Bill Gates bisa cu e area aki — incluyendo condicionnan manera preeclampsia te menopausa — a ser descuida pa demasiado tempo.**

E inversion ta un di e prome compromisonan grandi desde cu Gates a anuncia mas tempran den aña cu e lo regala su fortuna di \$200 biyon prome cu 2045. Esaki ta mas o menos un tercer mas cu loke e fundacion a gasta riba salud di hende muher y maternidad den e ultimo cinco aña.

“Salud di hende muher ta sigui ser ignora, sin suficiente fondo y poni banda. Aun tin demasiado hende muher cu ta muri pa causanan prevenible of ta biba cu malesa,” Gates a bisa den un declaracion. “E situacion aki mester cambia.”

E trabao lo enfoca riba area cu tin falta di investigacion, pero cu ta afecta shen miles di hende muher den paisnan tanto rico como pover — for di preeclampsia y diabetes gestacional te menstruacion pisa, endometriosis y menopausa.

E inversion lo concentra riba cinco area clave: cuido obstetrico y vacuna pa hende

muher na estado; salud y nutricion materno; salud ginecologico y menstrual; innovacion den anticonceptivo; y infeccionnan sexual transmiti.

E meta ta pa duna empuhe na investigacion, desaroya producto, y sigura acceso igual pa tur hende na mundo.

Segun dokter Anita Zaidi, director di igualdad di genero na e fundacion, e campo aki a keda atrasa parcialmente pa motibo di preferencia y falta di dato riba temanan clave, manera con medicamento ta pasa den e utero. “Si bo mira e literatura, tal bes tin apenas dies hende muher cu a ser studia,” el a bisa na Reuters. “Nos no tin ni e respuesta pa e preguntanan mas basico.”

Un analisis di McKinsey & Co di 2021 a indica cu apenas un porciento di fondo pa investigacion y innovacion medico ta bay pa condicionnan specifico pa hende muher cu no ta cancer.

Zaidi a reconoce cu e \$2,5 biyon ta apenas un pida chikito compara cu loke ta necesario, y a pidi otro sectornan pa tuma parti — incluyendo e sector priva, filantroponan, y gobierno.

E ex-casa di Gates, filantropo Melinda French Gates, tambe a inverti den salud di hende muher despues cu el a sali for di e fundacion aña pasa.



AVISO IMPORTANTE Pa Cliente di SmartUp Prepaid Service



En conexion cu un upgrade di ELMAR su Smart Grid, e sistema di recarga SmartUp Prepaid Meter no lo ta disponibel entre diamars 5 di augustus pa 10:00 PM te cu diaranson 6 di augustus pa 10:00 AM. Esaki no lo tin niun impacto riba e suministro di coriente na cliente.

ELMAR ta recomenda tur cliente pa Top Up bo SmartUp Prepaid Meter riba diamars 5 di augustus 2025 prome cu 10:00 PM.

Danki pa bo comprension.

E mundo di energia ta evoluciona. ELMAR ta sigui innova.

Corso: Atake di pitbull por costa doño mas di 200mil florin

(CuraçaoChronicle) – Un muhe Venezolano bibando na Corso ta enfrenta devastacion financiero despues cu su tres pitbull a ataca un peaton aña pasa, lagando e victima cu heridanen cu a afecta su bida. E incidente, cu a tuma lugar na augustus 2023, a resulta den proceduranan criminal y civil cu por costa e doño di e cachonan, Elena Carolina C., mas cu 200mil florin.

Corte di Prome Instancia a sentencia C. na un multa condicional di 5mil florin y a dun'e orden pa paga 22.600 florin adicional den daños. E



victima, cu no por traha mas pa motibo di e severidad di su lesionnan, tambe ta exigien-

E atake a tuma lugar despues cu e cachonan – yama Darla, Max y Ginger – a huy for di un buraco den un heki comparti. C. a bisa corte cu el a pidi e bisña rípitidamente pa drecha e buraco, pero no a tuma accion.

“Mi a purba di stop e cachonan, pero mi no por a preveni e atake,” el a testigua. C. eventualmente a hala e cachonan ley pero e mes a resulta herida den e proceso.

Hues mr. Bracht a describi e atake como “horibel” despues di revisa imagen di video presenta den corte. Corte a haya cu C. a faya di tuma e medidanan adecua di seguridad pa

preveni e huida di cachonan cu ta conoci di ta peligroso. Como parti di su sentencia, e tambe ta bay sirbi un periodo di tres aña condicional.

E caso no solo a costa C. su trabao, pero tambe a pon'e den centro di un bataya legal costoso, potencialmente lagando e responsable pa mas di 200mil florin den daño total.

Autoridadnan a recorda doñonan di mascota di nan responsabilidad pa sigura cu e animalnan ta conteni di manera sigur, specialmente si nan ta conoci di presenta riesgo pa seguridad publico.

Sint Maarten: Ottley ta bay solicita investigacion parlamentario tocante operacion di GEBE

(TheDailyHerald) – Parlamentario di partido United People (UP), Omar Ottley ta bisa cu e ta bay solicita formalmente un investigacion parlamentario tocante operacion y maneho di compania estatal di utilidad, NV GEBE.

Ottley a bisa cu e investigacion ta bay keda solicita un-abes Parlamento bolbe di reces. El a anuncia su intencion pa solicita e investigacion parlamentario den un video cu el a post riba diabierna, despues di e publicacion di dos articulo den The Daily Herald

tocante GEBE gastando mas di \$15 mil den un entrevista recien cu USA Today y tocante preocupacion expresa pa personal di GEBE tocante e estilo di liderazgo y maneho di comunicacion di CEO y manager di transicion, Thomas Roggendorf, incluyendo reportahenan cu el a sugeri duna retiro na varios empleado senior. Roggendorf a rechasa e ultimo acusacion.

Ottley a bisa The Daily Herald, cu a tuma contacto pa informacion adicional, cu e iniciativa ta bay ta basa riba Artículo 64 di Constitucion y Articulan 81 te 89



di Reglement van Orde di Parlamento, cu ta duna parlamentarionan e derecho pa

lansa un investigacion, referi comunmente como un investigacion parlamentario.

El a splica cu e prome stap ta bay ta entrega un solicitud formal por escrito na Parlamento, detayando e magnitud y proposito di e investigacion. Segun Ottley, e meta ta pa descubri e causanan raiz di e mal maneho di GEBE durante ultimo decada y fiha un caminda bayendo dilanti basa riba e hallazgonan.

Ottley a bisa cu su interes den lansa e investigacion ta bin di e situacion actual na GEBE, particularmente preguntanan rond di e proceso di aprobacion pa e gasto riba generator.

Universidad di Corso mester paga daños pa retiro ilegal

(CuraçaoChronicle) – A duna orden na Universidad di Corso pa paga 100mil florin den daños na un ex-docente kende a keda retira contra ley, cu efecto inmediato, segun veredicto di Corte Comun di Husticia.

E docente, un miembro senior di staff academico kende tabata emplea na e universidad desde 2010, a haya retiro na 2021 despues di reloca na Hulanda sin aprobacion. A pesar di e solicitud rechasa, el a continua dunando les remotamente – un practica cu a bira comun durante pandemia di Covid-19.

E universidad a considera e hecho cu el a muda pa Hulanda como un violacion serio y base pa retiro inmediato. Sinembargo, Corte a haya cu e mudamento no ta un mal-



conducta, ya cu e docente a cumpli cu su obligacionnan di duna les online. Huesnan a enfatisa cu e lesnan remoto

tabata generalmente acepta e tempo aya y a duna veredicto cu e retiro tabata desproporcional.

Corte ademas a considera cu e retiro a sucede memey di un relacion tenso y pro-

longa entre e docente y su supervisor. Mientras cu no a duna veredicto riba e motivacionnan tras di e retiro, Corte si a reconoce cu e situacion por a contribui na decision di e universidad.

Den su veredicto, Corte a critica e universidad pa no tuma stapnan adecua pa atende e conflicto of considera accion disciplinario mas leve. Como resultado, e retiro cu efecto inmediato a keda considera invalido, maske e contract di empleo toch a keda termina. E universidad awo mester paga 100mil florin den compensacion, como tambe cubri 1.400 florin den gasto legal y 300 florin den gasto di corte.

E caso ta subraya e riesgo legal cu institucionnan ta enfrenta ora ta trata di disputa laboral sin documentacion of proceso debido.

AWAWE

MINI MEGA

MEGA PLUS

Awo cu 2 florin mas, bo por gana e

*** Afl. 485.000,-**

*** Afl. 325.000,- + Afl. 160.000,- extra**

Benta ta sera 7:30 pm y sorteo ta hunga 7:45 pm

MEGA PLUS



HUNGA AWO

LOTO







Furia palpable na protesta contra femicidio na Rotterdam; Mas cu mil participante

(NLTimes) – Mas di mil persona a reuni na Schouwburgplein na Rotterdam diadomingo pa protesta contra femicidio, sigui pa un marcha den centro di ciudad. E furia y tristesa tabata palpable den palabranan di esnan presenta y oradornan riba escenario, caminda potretnan grandi di victimanan di femicidio tabata ser exponi cu borch di protesta, NOS ta informa. Un fila di hilchi cora tabata simbolisa e victimanan.

E protesta a ser organisa pa Dolle Mina, un grupo activista feminista funda na 1969, cu a campaña den añanan 1970 pa oportunidadnan igual, kibrando rolnan tradicional di genero, y legalisa aborto. Despues di casi 50 año, e grupo ta back.

“E marcha aki ta transcende

politica di genero y partido, pasobra violencia contra hende muhe no ta un problema di hende muhe, pero un problema social,” Joice (43) di Dolle Mina a bisa cu un aplauso fuerte. “Nos ta aki pasobra tabata mucho trankil. Mucho largo y mucho frecuente.”

Dolle Mina a regresa for di su retiro pa motibo di dos femicidio luna pasa. Joeweela di 39 año di edad a ser tira mata pa su ex casa dilanti di nan dos yiunan na Gouda dia 16 di juli. Y dos dia despues, un dama di 38 año a ser asesina na Vlijmen na Noord-Brabant. Su pareha ta e sospechoso.

“Dos muhe. Dos dia. Dos asesinato,” a lesa e yamada pa e manifestacion. “Ta basta,” a ser scucha rípidamente na Rotterdam, segun e emisora. “E Marcha di Femicidio ta un yamado pa spierta,” Joice

a bisa.

E manifestantenan tambe a inclui miembran di e guardia bieu di Dolle Mina. Therese di 78 año no ta activo mas den e movimiento, pero a sinti cu tabata importante pa asisti na e protesta aki. “Tur hende ta papia, pero niun hende no ta haci nada. Esey ta pone mi rabia. Ora mi lesa corant, mi ta rabia,” el a bisa NOS. “Ora bo wak e asesinatonan horibel di luna pasa y e indiferencia cu a sigui. Mi por a yora, yora di rabia.”

Parlamentario di GroenLinks-PvdA Songül Mutluer tambe a asisti na e protesta. El a entrega un mocion cu proposicionnan pa atende cu femicidio mas efectivamente. “Femicidio ta transcende cultura. E ta sucede na tur nivel di sociedad. E no ta un asunto cultural, pero un asunto humano.”



E multitud di manifestantenan a inclui tambe varios homber. Roeland di 50 año a asisti hunto cu su yiu muhe. Su borch di protesta tabata un caha di pizza cu e palabranan: “Mi cushinamento ta un drama di famia. Femicidio ta femicidio.” Y riba e parti patras: “Femicidio ta un problema di hende homber.”

“Ta hopi importante cu mi ta para aki awe como un

homber. Hende homber ta e actornan, hende muhe ta e victimanan den casi tur caso,” el a bisa NOS. E ta spera cu mas homber lo papia. “Cu hombernan ta compronde cu tin un problema y no ta trivialis’e.”

Cada ocho dia, un hende muhe ta ser asesina na Hulanda. Den casi 60% di e casonan, e asesino ta su partner of ex partner.

Hulanda ta bira e prome nacion den NATO cu a cumpra arma Mericano pa Ucrania den ayudo di \$500 milyon

(NLTimes) - Hulanda a bira e prome pais di NATO (Organisacion di Tratado Nort Atlantico) cu ta cumpra ekipo militar directamente for di Merca pa Ucrania, asina minister di Defensa Hulandes, Kajsa Ollongren (VVD) a anuncia dialuna. E pakete di sosten di 500 milyon euro (540 milyon dollar Mericano) lo suministra Ucrania cu material di defensa critico, incluyendo componentenan pa sistema di defensa aereo Patriot, municion, y otro articulonan esencial adapta na e necesidadnan di Ucrania, segun RTL Nieuws.

E iniciativa ta sigui un acuerdo di 14 di juli entre presidente di Merca, Donald Trump y Secretario General di NATO, Mark Rutte, disena pa aumenta ayudo militar



coordina na Ucrania a traves di adkision directo for di Merca. E acuerdo nobo ta complementa e sosten existente di Hulanda, añadiendo na casi 6 bion euro na asistencia militar suministra pa Hulanda for di februari 2020.

Minister Ollongren a enfatisa e urgencia di ayudo continuo: “E atakenan diario di Rusia ta

puro terror, cu e intencion di kibra Ucrania. Nos, como Hulanda, lo no permiti esey sucede. Solamente door di sostene e pais cu resolucion nos por aumenta presion riba Rusia y contraresta agresion di Rusia.”

Ollongren a destaca mas aleu e interesnan di seguridad mas amplio: “Mas bentaha Rusia

gana na Ucrania, mas grandi e menasa e ta representa pa e resto di Europa. E seguridad di Ucrania ta directamente mara na e seguridad di Hulanda y aliadonan di NATO.”

E armanan cumpra pa medio di e mecanismo nobo aki lo ser entrega hunto cu envionan similar di otro miembran di NATO. E prome envionan ta ser spera na Ucrania e luna aki, cu entreganan di seguimiento programa cada dos pa tres siman.

E coresponsal politico di RTL Fons Lambie a señala e nificacion politico y strategico di e arreglo: “Esaki ta e prome biaha cu e construccion nobo entre Merca, NATO y paisnan Europeo ta ser usa pa suministra armanan na Ucrania. Hulanda ta entre e lidernan, pero ta spera mas anuncio di otro nacionnan Europeo pronto.”

Lambie a splica cu e acuerdo a marca un cambio notabel pa presidente Trump, kende anteriormente a duda riba aumenta entrega di arma pa Ucrania. “Na mitar di juli, Trump y e hefe di NATO Rutte a yega na e acuerdo aki: Paisnan Europeo ta cumpra arma for di Merca y ta entrega nan directamente na Ucrania. Despues di e cumbre di NATO na Den Haag, esaki tabata un exito tangible pa Rutte, kende ta trahando duro pa mantene e sosten Mericano pa Europa.”

El a describi e acuerdo manera “un triunfo pa Trump, kende awor por mostra compranan Europeo di ekipo di defensa Mericano,” y “un mester pa paisnan Europeo, cu no ta posee e sistemanan di arma aki nan mes. Pa Ucrania, e ta un asunto di bida y morto den e guerra cu Rusia.”

Argentina: Milei ta veto aumento di pensioen y beneficio pa discapacidad, citando promesa di deficit fiscal

(AP) — Presidente libertario, Javier Milei dialuna a veto un intento pa aumenta gasto riba pensioen na Argentina y un ley expandiendo proteccion pa hende cu discapacidad, bisando cu e legislacion lo mina su promesa emblematico pa elimina e deficit fiscal cronico di e pais prome cu eleccion na october.

Publicando e decisionnan di veto, administracion di Milei a bisa cu Congreso luna pasa a pasa e ley di gasto — destina pa compensa e pensionadonan mas completamente pa inflacion y ofrece mas beneficio financiero pa hende cu discapacidad — “sin determina e fuente di e fondonan.” A bisa cu e leynan “a contradeci e mandato popular (di Milei)” pa baha inflacion.

Desde cu a asumi poder fin



di 2023, Milei a veto tur esfuerso pa reforsa gasto publico, hopi biaha usando e slogan “no tin placa” contra e exigencianan di hende pa restaura subsidio. Gobierno ta proyecta cu e gastonan adicional, incluyendo un aumento di 7.2% den pensioen, lo conta pa alrededor di 0.9 porciento di GDP e aña aki y 1.68 porciento proximo aña.

“E presidente ta prefera di bisa un berdad incomodo en bes di ripiti mentiranen comodo: No tin placa,” gobierno a bisa. Basa riba e slogan di su aliado, presidente Mericano, Donald Trump, a agrega: “E unico manera pa haci Argentina great di nobo ta cu esfuerso y honestidad, no e mesun recetan bieu.”

Aña pasa, Milei a logra e prome surplus fiscal anual di Argentina den 14 aña, door di haci recortenan doloroso na gasto social y obra publico. E medidanan di austeridad a yuda baha e tasa di inflacion mensual na Argentina na bao di 2 porciento na juni pa prome biaha den cinco aña, compara cu 25 porciento na momento cu Milei a asumi su cargo na december 2023.

Pero e programa di shock fiscal tambe a profundisa miseria economico pa hopi Argentino: Desempleo a aumenta, salario ahusta pa inflacion a baha, y prijs ainda tin un aumento di 40 porciento YOY (year-on-year).

Congreso ainda por reverti e vetonan aki cu un mayoria di dos tercera parti den ambos camara, un reto pa e partido libertario di Milei, cu tin apenas un minoria chikito di

asiento.

Milei, kende su relacion cu legisladornan ta tenso desde cu el a asumi su cargo, aña pasa a logra gana suficiente voto di e aliado mas cercano di su partido, e bloke conservador PRO, pa preveni aumento di pensioen.

Milei tin bista riba e eleccion crucial intermedio na october pa reforsa e representacion di su partido mientras e ta sigui impulsa su campaña di balansa fiscal y atrae mas inversion stranhero.

Pensionadonan ta den frente di protesta contra gobierno di Milei. Cada diaranson awo pa lunas, decenas di adulto mayor Argentino luchando pa sobrevivi riba un pensioen di apenas \$400 pa luna a enfrenta contra forsanen di seguridad arma cu ga lagrimogeno y cañon di awa.

Brazil: Corte Supremo firme den huicio contra Bolsonaro a pesar di presion stranhero



(AP) — Hues di Corte Supremo di Brazil, Alexandre de Moraes a bisa durante weekend cu e corte superior di e pais no ta bay rindi na sancionnan of presion stranhero pa motibo di e huicio contra ex-presidente Jair Bolsonaro, cu ta spera di tuma lugar e aña aki.

De Moraes, kende ta a cargo di e caso criminal contra Bolsonaro, no a menciona Merca of Donald Trump den su comentarionan, pero tension entre Merca y Brazil a escala siman pasa. Diaranson, Departamento di Tesoro Mericano a anuncia sancion contra De Moraes pa supuesto supresion di libertad di expresion, y Trump a firma un orden ehecutivo imponiendo un tarifa di 50 porciento riba productonan Brasileño.

Gobierno Mericano a cita loke a describi como e “persecucion politico” di Bolsonaro como e motibo pa su accionnan.

E ex-presidente ta enfrentando un huicio pa supuestamente orkestra un complot pa keda na poder despues di perde eleccion na 2022, contra actual presidente Luis Inacio Lula da Silva. E proceduranan legal ta den nan etapa final, y segun hues De

Moraes, ta spera di conclui pa fin di e aña aki.

“E schedule procedural di Corte Supremo no ta bay keda ni acelera ni retrasa,” hues De Moraes a bisa. “E corte ta bay ignora e sancionnan.”

De Moraes a ricibi sosten di presidente di Corte Supremo Brasileño, Luis Roberto Barroso y di hues Gilmar Mendes, kende a papia

promete cune.

Den respuesta na e accionnan recientemente di Merca, De Moraes a enfatisa e independencia di hudiciario di Brazil, bisando cu “e Corte Supremo semper ta bay ta firme den e defensa di soberania nacional, den su compromiso na democracia y estado di derecho, den su compromiso na e independencia di e hudiciario y e principionan Constitucional di Brazil.”

Mientras huesnan a reuni na e capital, Brasilia, manifestantenan a reuni pafo di e consulado Mericano na Sao Paulo, cu borchinan defendiendo soberania di Brazil y haciendo un yamado riba presidente Trump y prome minister Israeli, Benjamin Netanyahu pa keda fuera di Brazil y Palestina. Organisa pa sindicato y movementonan social, e manifestantenan tambe a kima popchinan di Trump y Bolsonaro.



Jamaica: Lider di PNP ta bisa cu si elogie, PNP lo haci destitucion un realidad

(JamaicaObserver) - Presidente di Partido Nacional di Pueblo (PNP), Mark Golding a indica cu su partido politico no ta laga bay un intento fracasa pa introduci un Proyecto di Ley di miembronan priva modifica pa facilita e destitucion di miembronan di Parlamento pa cierto ofensa.

Golding, kende a introduci e Proyecto di Ley titula "Ley di Constitucion (Amienda) (Impeachment), 2021", a bisa cu si PNP haya e chens pa forma e siguiente Gobierno, "nos ta bay bin cu impeachment".

"Mi a trece e Proyecto di Ley di destitucion back na Parlamento cu algun modificacion tres aña pasa, y Gobierno no a haci nada cune, y nos no por pas'e pasobra nos ta den minoria den Parlamento. Nan no a haci nada tocante di dje aunke e tabata un promesa di manifesto di 2016 di Andrew Holness," Golding a argumenta, kende tabata dirigi su mes na un reunion di Parlamento Independiente di Moreland.

"Mi a limpie y a set e un tiki diferente, amistoso, pa e por a cubri un rango mas amplio di actonan teribel," el a agrega.

Minister di Asuntunan Huridico y Constitucional Marlene Malahoo Forte, den su contribucion na e Debate Sectoral na 2021, a argumenta cu, despues di deliberacionnan largo, e comision cu ta revisa e Constitucion di Jamaica a propone cu no mester tin inclusion di un proceso di destitucion den e Constitucion di aspecto nobo.

Golding a mostra riba un incidente di cuater aña pasa den cual un homber a ser mira den un video cu a bira viral ta dal un hende muhe cu un stoel, como su motivacion pa trece e Proyecto di Ley dilanti. Miembro di Parlamento di Westmoreland Central George Wright a bira involvi den e controversia ey.

"Mi no por a kere mi wowonan cu un miembro di Parlamento lo a comporta asina, y nan [e Partido Laborista di Jamaica] no a haci nada al respecto. E homber a sinta den Parlamento; e no a ricibi ningun sancion di Parlamen-

to, y awor nan ta bay core como candidato den e municipalidad aki. Falta di respet grandi pa e hende muhe di Central Westmoreland pa e hende muhe Grandi di Jamaica," el a declara.

"Ta p'esey nos mester tin un procedura di destitucion pa nos por atende e tipo di asuntunan ey, caminda e parlamentario y funcionarionan publico ta comporta nan mes di un manera cu ta trece nan oficina den desprestigio; mester tin algo cu por ser haci pa sanciona nan," e lider di PNP a agrega.

Di otro banda, Wright, kende ta ser bisa di ta bon stima den e municipalidad, no a ni confirma ni nenga acusacionnan cu a sugeri cu e tabata e perpetrador den e video.

Wright a casa for di e tempo ey cu e muhe cu tambe tabata supuestamente den e video viral.

Algun dia despues cu e video a cuminsa circula riba medionan social polis a cera nan investigacion den e asunto como resultado di e falta di boluntad di e partidonan en-



volvi, y testigonan potencial, pa participa den e investigacion, y tambe e mal calidad di e video cu supuestamente a captura e incidente.

Un recomendacion similar a ser haci pa prome biaha door di e Comision di Piedra, cu a ser presidi pa e defunto sociologo Profesor Carl Stone na

1992. Despues, na 2011, Minister di Husticia Delroy Chuck a introduci un Proyecto di Ley den Parlamento pa destitucion di funcionarionan publico cu ta haci mal uso di nan funcion. Sinembargo, un cambio den Administracion a sigui y e Proyecto di Ley a cay for di agenda.

Trinidad y Tobago: WASA ta riesga \$35 miyon di boet anual

(TrinidadExpress) - Autoridad di Awa y Riool (WASA) ta bisa cu e por enfrenta un castigo anual di \$35 miyon di e Autoridad di Maneho di Medio Ambiente (EMA) pa violacionnan di descarga continuo di likido na e Planta di Tratamento di Awa Sushi di Beetham.

E potencial boet ta bin di WASA su incumplimento cu e Reglanan di Contaminacion di Awa (2019), cu ta regula e descarga di contaminantenan den medio ambiente.

E revelacion a ser haci diabierna ultimo durante un recorrido di e facilidad di e planta di Beetham door di e Team di Evolucion Ehecutivo recién forma di WASA, dirigi pa e hefe ehecutivo interino Jeevan Joseph.

Den un comunicado di prensa, director interino di Wastewater Services Krishna Persadsingh a bisa cu e facilidad di Beetham, encarga na 2004, a deteriora significativamente durante añanan. El a



bisa cu e planta awor ta rekeri un calculacion di \$175 miyon den trabounan di renobacion pa cumpli cu normanan regulatorio.

For di 2015 te awor, e manencion di e planta a ser negligisha, y fayonan den casi tur unidad di proceso a resulta

den un bahada den calidad di likido," WASA a declara. "Esaki ta pone WASA na riesgo di castigo y ta menasa e salud ambiental y publico."

E Planta di Tratamento di Awa Sushi di Beetham ta un di esnan mas grandi den Caribe, sirbiendo un calcula-

cion di 182.500 residente den Port of Spain, Diego Martin, Maraval, St Ann's, Mt Hope y areanan rond di dje. E ta un di cuater planta di awa di desperdicio monitoria pa EMA, hunto cu Harmony Hall, Lange Park y Maloney.

Asuntunan di descarga persistente a pone EMA considera impone tarifanan di descarga pa incumplimento, WASA a declara.

Mientras tanto, CEO interino Joseph a anuncia e establecimiento di un directorado dedica na awa di desperdicio dentro di WASA pa atende e retonan y reduci exposicion financiero na castigo potencial.

Despues di e inspeccion, e parlamentario di Laventille West Kareem Marcelle a guia oficialnan di WASA door di e comunidad di Beetham Gardens, caminda habitantenan a expresa nan frustracion pa motibo di problemanan cronico di awa di desperdicio.

Un residente a bisa oficial-

nan cu e problema a persisti pa mas cu cinco aña, WASA a declara.

Pa atende e preocupacionnan aki, Joseph a compromete su mes pa reemplasa e riool principal cu a colapse.

Ta anticipa cu e proyecto ey lo ta finalisa pa februari 2026 y ta dirigi riba resolve descarganan di likido persistente den e area.



Celebracion di 10 aña di festival di canto dedica na Bernadina Growell-Kock

Den fin di siman, na Centro di Bario Brazil, a tuma luga e di 10 edicion di Festival di Canto dedica na nos Mama di Cultura, Sra. Bernadina Growell-Kock. E festival, cual ta honra e legado cultural y musical di Bernadina, a uni talento local, emocion y patriotismo den un ambiente di gran inspiracion y alegria.

Den su discurso di apertura, Sr. Mariano Bermudez, vicepresidente di e Fundacion, a expresa gratitud na pueblo y a recorda cu e aña aki ta un momento historico:
10 aña di Festival di Canto
15 aña di Nos Caya Bernadina
15 aña di Parada Cultural

Durante un rueda di prensa lo wordo anuncia e participacion den e gran Parada Cultural cu su tema nobo, y presentacion di proyectonan futuro pa sigui promove e identidad cultural di Aruba. E festival a resulta un exito rotundo cu participacion di 22 cantante y 8 agrupacionnan tipico, tur cu un presentacion cu a lanta publico y a pone nos tradicion musical den prome plano.

Un momento sobresaliente tabata e categoria “Propio Composicion”, introduci den e edicion aki pa stimula creacion nobo di cancionnan dedica na memoria di Bernadina.

Aki bou ta e resultado oficial: Ganador Absoluto – Propio Composicion:

Raquel E. Lampe cu e cancion “Mosa di nos alma”, un obra di compositor Jhon Freddy T. Montoya, cu areglo di Danny Koolman, acompaña pa Agrupacion Tipico Stima Mi.

Segundo Luga:

E duo hubenil Whitney Nin & Ashanti Zimmerman cu e cancion “Mama ta un Pilar”, di compositor Jhon Freddy T. Montoya, aregla pa Johnny Scarbaay, acompaña pa Grupo Tipico Arubiano.

Tercer Luga:

Angelo Koolman, compositor y cantante di su mes cancion, acompaña pa Frank Croes y su Tipico Pegasaya.

Tur esakinan tabata composicionnan nobo cu ritmo di tumba, pone den escena e tradicion musical autentico y



vibrante di Aruba.

Den e categoria di Cancion Existente, tabatin igual nivel halto di talento y emocion: Ganador Absoluto – Cancion Existente:

Indra Stamper cu e cancion “Indjan di Aruba”, acompaña pa Agrupacion Tradicion Musical.

Segundo Luga:

Ryan Sy, hoben talentoso, cu e cancion “Pilar”, acompaña pa Grupo Colegio Arubiano.

Tercer Luga:

Hellen Arends cu e cancion “Un Soño”, acompaña pa Tipico Alegria.

Tur e tres cancionnan tabata composita originalmente

pa Sra. Bernadina Growell-Kock, y su letra y melodia a logra emociona y inspira e publico presente.

Ademas, den marco di e celebracion di 10 aña di e Festival, a wordo otorga dos Premian Special di Trahe Folklorico, reconociendo e miho presentacion visual y cultural tanto pa dama como pa cabayero.

E premio pa Cabayero cu Trahe Folklorico mas resalta a ser otorga na Sr. Jhon Freddy T.

Montoya, ken, ademas di su vestuario emblematico, a toca e curazon di e publico cu su interpretacion cu hopi sentimiento di e cancion



“Recuerdo” di Don Ramon Krozendijk, acompaña magistralmente pa Grupo Stima Mi.

Pa categoria di Dama, e homenahe a bay pa Julienne Schwengle, cu su interpretacion di “Di Dia cu M’a Conoce Bo”, un tributo inolvidabel na nos Mama di Cultura Aruba, acompaña pa Tipico Alegria.

Pa finalisa, e Premio di Mas Popular, escogi pa voto di e publico presente, a ser otorga na Indra Stamper cu su presentacion vibrante hunto cu Agrupacion Tradicion Musical.

Mester resalta e excelente participacion di e hobennan Arubiano, cu curazon y en-

trega a pone nan talento na disposicion di nos cultura. Masha pabien na tur participante, cantante, compositor, agrupacion y coristanan pa un presentacion inolvidabel.

Un palabra special di felicitacion na tur miembro di Fundacion Bernadina Growell Kock, cu entrega y dedicacion a logra e meta di e festival: honra nos Mama di Cultura y preserva su legado.

Departamento di Cultura Aruba ta felicita y gradici tur organisadornan, participante, y colaboradornan pa un festival cu definitivamente a logra su obhetivo: mantene bibo e legado di Bernadina Growell Kock, y honra e alma musical di Aruba.

5 reportahe di violencia sexual durante weekend di Pride Amsterdam

(NLTimes)—Centro di Violencia Sexual di Amsterdam-Amstelland a ricibi cinco reportahe di victima di violencia sexual durante e weekend di Pride na Amsterdam. E organisadornan ta considera e evento como un gran exito, yamando e actividadnan “un serie di momentonan sobresaliente.” Trabaonan di limpieza ta keda riba un ritmo acelera pa yuda pone e centro di ciudad back den su estado original.

E Canal Parade, cu ta e evento principal di Pride Amsterdam, a tuma lugar e weekend aki cu a pasa. E centro di violencia sexual tabata habri pa mas largo, cu cinco empleadonan presente pa ricibi reportahenan y duna sosten pa victimanan. E victimanan tabata tanto hende muher como hende homber y ta bin for di grupo di edadnan varia, segun un vocero di e centro.



“Ta trata tanto di abuso sexual como di violacion,” e vocero a bisa. Pa motibo di privacidad, el a rechasa di duna mas detaye riba e tipo y gravedad di e incidentenan violento. No ta cla si e violencia a tuma lugar durante e actividadnan di Pride.

Polis di Amsterdam no por a confirma diadomingo anochi cuanto reportahe di violencia sexual nan a ricibi. “Fuera di esey, Pride a pasa pacíficamente y sin incidentenan grandi,” segun un vocero di

polis.

E organisadornan di Pride Amsterdam tambe ta satisfecho cu e evento di e aña aki, cu a culmina diadomingo anochi cu un fiesta di clausura cu hopi hende asistiendo na Plaza Dam. “Tabata un serie di momentonan sobresaliente,” un vocero di e organizacion a bisa.

“300 actividad grandi y chikito durante e ultimo nueve dianan a tuma lugar casi sin fayto,” e vocero a agrega. “No

importa si tabata e Canal Parade cu tabata multitudinario of un di e actividadnan chikito, tur caminda tabata yen di hende y a impresiona tanto riba bishitantenan como participantenan.”

E organisadornan tambe ta satisfecho cu e impacto di e mensahenan cu e participantenan di e Canal Parade a transmiti. “E lucha pa visibilidad di e comunidad LGBTQ+ y pa igualdad di derecho tabata claramente presente.”

Amsterdam lo organisa WorldPride na 2026. “E edicion aki tabata un bon ensayo pa e proximo aña, unda lo tin 500 eventonan durante 15 dia, y lo ta considerablemente mas largo y grandi cu e edicion normal.”

Recogedonan di sushi den centro di Amsterdam a piki mas cu 84 tonelada di sushi despues di e Canal Parade. Empleadonan di municipali-

dad a cuminsa limpi diasabra atardi y, segun un vocero municipal, a sigui traha durante e anochi. Segun e, e limpiamento a bay bon. Aña pasa tabatin mas o menos 101 tonelada di sushi recogido.

Limpiamento di e canalnan tambe ta bayendo bon, segun un vocero di Waternet. El a bisa cu e cantidad di sushi ta comparable cu esun di aña pasa. “Un cantidad grandi di plastic a ser descubri, cu un calculacion inicial di rond di 500 kilo,” el a bisa. “Esaki ta hopi, pasobra plastic ta pisa poco.” El a menciona cu esaki ta inclui hopi cup, boter y cupnan di Styrofoam.

Waternet a bisa cu e lo sigui limpi e canalnan dialuna y diamars. “Tin hopi plastic ainda, specialmente entre e botonan. Nos no a caba ainda.”

Potret di gemeente Amsterdam.

Un homber a cay y fayece durante un concierto di Oasis den Wembley Stadium na Londres



(AP) — Oasis a bisa diadomingo cu nan ta “sorprendi y tristo” despues cu un homber a cay y muri durante un concierto di e banda den Wembley Stadium na Londres.

Polis Metropolitano a informa cu oficialnan y paramediconan a responde na un reportahe di un persona herida poco prome di 10:30 diasabra anochi.

Segun nan, un homber den su 40 aña a ser haya “cu heridanen cu ta corresponde cu un caida.” El a ser declara morto na e sitio. Polis ta pidi pa tur persona cu a mira loke a pasa of cu a graba algo cu nan telefon ta tuma contacto cu nan.

“Nos ta sorprendi y tristo pa tende di e fayecimento tragico di un fan durante e show ayera nochi,” Oasis a bisa den un declaracion, ofreci-

endo “sincero condolencia na famia y amigonan di e persona involucra.”

E banda iconico di Britpop

su prome tour den 16 aña a cuminsa dia 4 di juli na Cardiff, Gales. E concierto diasabra tabata e di cuater show di un total di siete planea den

Wembley.

E maneho di e stadion a bisa e tempo ey cu e concierto programa pa diadomingo lo sigui normal.

START YOUR DAY IN PARADISE

20% off for locals*

laguna

OPEN DAILY 7 – 11 AM

For reservations +297-526-6612

Hilton
ARUBA CARIBBEAN RESORT & CASINO

Extensive Buffet
Air-Conditioned Dining
Your Favorite Breakfast Classics
Wake-Up Cocktails
Outdoor Terrace Dining
A La Carte Breakfast Specialties

*Offer is valid for local residents with a local ID. Limited to a maximum of 30 persons. Bottles are not included in this offer.

Careda ta cuminsa pa Bristol Motor Speedway prepara pa NASCAR despues di MLB Speedway Classic

(AP) — Na mesun momento cu Atlanta Braves y Cincinnati Reds a laga e campo di baseball memey di Bristol Motor Speedway, un holoshi nobo a cuminsa conta.

“The Last Great Colosseum” mester cambia for di e escenario di MLB Speedway Classic pa ta cla pa NASCAR su regreso riba e pista historico, cu ta anfitrión un careda di playoff riba 13 di september.

“Mesora despues cu e ultimo pitch ser lansa, e ultimo bate dal, e teamnan ta cumpli cu nan cosnan y e programa despues cu e partido ta cla, nan lo cuminsa kita e panelnan di e muraya, y nan lo traha durante oranan di anochi pa cuminsa dismantela tur cos pa por arma back pa e careda di NASCAR,” Steve Swift, vice-presidente senior di operacion pa Speedway Motorsports, a bisa.

Major League Baseball a usa e compania BaAM pa crea tur loke tabata necesario:



clubhousenan pa e teamnan completa cu ducha, camber pa entrenamiento, oficina pa coachnan y fisioterapistanan, y incluso batting cages. Tribunanan a ser instala banda di e base lines, cu cabina pa transmision tambe.

E murayanan di e pit a ser kita pa evita cu Braves y Reds dal contra nan, pero nan mester ser construi back. Swift a bisa cu pone asfalt ta tuma tempo y despues mester laga e asfalt seca tambe.

Tin aditivonan cu por yuda e asfalt seca mas lihe, pero esey

ta un di e hopi desafionan di reconstruccion.

Swift a bisa cu Bristol tin bon partnernan pa planifica tur e detayenan, pero awor ta tempo pa Bristol Motor Speedway regresa for di e prome partido regular di MLB na Tennessee — cu a establece un record cu 91.032 entrada paga — pa su raiznan como pista di careda.

“Ta dificil, pero esey ta loke nos gusta,” Swift a bisa. “Nos gusta e tipo di reto aki.”

Pa traha un campo di baseball

den e medio di e pista, tabata falta 17.500 ton di piedra pa nivela e tereno, despues 340 ton di klei di Pennsylvania pa cubri e superficie pa wega.

Matt Olson, e primera base di Braves, a bisa diasabra cu e no por kere cu nan a transforma Bristol solamente pa un partido. Tur cos cu por ser recicla lo ser usa den otro lugarnan despues cu nan kita e campo di baseball.

Algun di e piedra lo bay pa e parking di Bristol Motor Speedway. Swift a bisa cu nan a haya organisacionnan pa yuda usa e materialnan pa hende cu ainda ta recuperando for di daño di horcan Helene — incluyendo 2x4 y plywood cu a ser usa pa traha e tribunanan.

“Hopi di e cosnan lo haya un bon uso den e proceso di reconstruccion,” Swift a bisa. “Nos mester kita nan simplemente pa por pone asfalt y concret back.”

E calendario pa renobacion tin algun dia extra inclui pa

emergencia. E meta ta pa keda cla riba 7 di september. “Por tin un tiki pintura cu ainda ta secando ora cu hauler-snan di Goodyear yega, pero nos ta purba caba pa e dia ey,” Swift a bisa. “Y si no, e ultimo fecha ta diamars.”

Bristol a organisa un partido di futbol colegial den 2016 cu a trece 156.990 hende. Awor NHL por ta den e futuro di Bristol despues cu Sportico a reporta diabierna cu oficialmente di e liga lo bishita pa wak con e pista a mancha e evento di MLB.

Ora nan a puntra si nan por organisa un partido di hockey bao di cielo habri, Swift solamente a bisa cu un rink di hockey ta similar cu un campo di futbol, y cu Speedway Motorsports tin un soño pa e tipo di evento cu por tuma luga na lugarnan manera Bristol.

“Nos a muestra cu futbol y awor baseball por tuma luga aki, y cu nos por logra cosnan cu otro hende no ta imagina,” Swift a bisa.

Fundacion Hulandes ta demanda FIFA y KNVB pa daño financiero cu futbolistanan ta sufri a causa di regla di transferencia

(NLTimes)—E fundacion Hulandes Justice for Players lo presenta un demanda colectivo contra FIFA y cinco otro federacion di futbol, incluyendo KNVB. E fundacion ta busca compensacion pa futbolistanan cu a perde ingreso pa motibo di regulacionnan di transferencia di FIFA desde 2002. Justice for Players ta calcula cu 100.000 hungador por ta afecta, cu e total di daño posiblemente yegando biyones di euro, segun e fundacion a conta NOS.

Riba dialuna mainta, Justice for Players a informa FIFA, KNVB, y e federacionnan di futbol di Alemania, Francia, Belgica y Dinamarca tocante nan intencion pa presenta un demanda colectivo. E fundacion ta considera tambe e federacionnan nacional como responsable, pasobra nan ta impone e reglamento di FIFA. E reclamo lo ser presenta den corte di distrito Midden-Nederland mas despues den aña.



E caso ta sali for di e caso Diarra. Futbolista Frances Lassana Diarra a termina su contracto cu Lokomotiv Moscow despues di un disputa. FIFA a dun’e un multa di mas cu 10,5 milyon euro, y e regla di transferencia a stroba cu e por firma cu otro

club, pasobra cualkier club nobo tambe lo ser penalisa.

E hungador Frances a desafia esaki, y Corte Europeo di Husticia a dicta na su favor den october 2024. “E reglamento ta stroba e movicion liber di futbolistanan profes-

sional cu kier termina nan contracto unilateralmente,” e corte a bisa e tempo ey.

Segun Justice for Players, e regla “ilegal” di FIFA a causa cu hopi otro futbolista tambe a perde ingreso significativo. “Nos ta presenta e reclamo

aki pa logra husticia pa futbolistanan,” presidente di e fundacion, Lucia Melcherts, a bisa NOS.

Segun e fundacion, economanan a calcula cu futbolistanan profesional afecta a haya mas o menos 8 por ciento menos ingreso durante nan carera pa motibo di e regla di transferencia. E reglamento a haci cambio di club mas dificil of a debilita nan posicion den negociacion. Justice for Players ta calcula cu 100.000 futbolista profesional a ser perhudica desde 2002, incluyendo tanto di futbol di hende homber como hende muher den liga grandi y chikito.

Justice for Players tin e intencion di traha un solo procedura contra tur partido involucra. “Esaki ta un reclamo cu ta bale biyones,” abogado deportivo Dolf Segaar, un otro miembro di e directiva di e fundacion, a bisa. “E reclamo ta basa riba responsabilidad solidario. Si un partido no paga, e otro tin cu cubri.”

Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com



Un momento historico pa futbol hubenil

Aruba ta anfrition di Concacaf Under-15 Boys' Championship

Minister di Deporte, Minister Gerlien Croes ta expresa su gran orguyo cu Aruba ta pais anfrition di e prestigioso Concacaf Under-15 Boys' Championship, cu lo tuma luga di 4 pa 10 di augustus venidero.

E campeonato ta uni region pa cu futbol hubenil, unda 16 pais, dividi den 4 grupo di 4, lo competi na un nivel halto di competencia hubenil di futbol. Aruba ta forma parti di un grupo desafiante y lo enfrenta Jamaica, Corsou y Belize.

Manera Minister Gerlien Croes ta destaca "e evento aki ta representa hopi mas cu solamente un torneo di futbol. Esaki ta un plataforma pa nos hobennan sobresali, pa por desaroya y pa demostra cu Aruba tin talento, pasion y potencial riba nivel internacional. E torneo aki ta un



paso importante pa motiva y fortalece nos infraestructura deportivo y pa crea mas oportunidad pa nos hobennan".

E ekipo nacional di Aruba ta wordo lidera pa coach Dreyer Bracho, apoya pa un team tecnico dedica y profesional pa guia nos hobennan durante e campeonato. E torneo ta un plataforma pa e hobennan crece, briya y representa nos

bandera cu orguyo.

Minister Croes ta expresa su gratitud pa e esfuerso di, CONCACAF AVB y tur colaborador, y ta pone enfasis riba importancia di sosten y formacion pa nos talentonan.

Ban hunto apoya nos seleccion nacional U-15 durante cada wega. Deseando nan tur clase di exito, pasion y determinacion. Aruba ta cu boso!



Torneo di Balls Out a inicia riba veld di Centro di Bario Noord

Royal Power Tat Fat ta derota Venezuela 18-8 den prome wega den salida

Diabierna ultimo a inicia e Torneo "Balls Out" organisa pa e ekipo Suicide Squad cual porcierto ta un torneo di softball cu duracion di 9 siman. Motor entre otro tras di e torneo aki ta Jourick Blanco y su directiva.

Torneo Balls Out ta reparti entre 2 Pool competitivo A y B cu un total di 12 Team. Alabes tin un Pool comercial A y B cu un total di 12 ekipo mientras tin un seccion di Damas cu un Pool cu 4 ekipo. Pues 28 ekipo total ta mirando accion cuminsando 1 di augustus ultimo y lo termina e weekend di 26 y 27 di september proximo.

Royal Power actual campeon di Copa Noord 2025 ta participando pa prome biaha den torneo di Balls Out a mira accion diabierna ultimo como e wega inaugural di e torneo aki. Royal Power a topa



e fuerte ekipo di Venezuela pero a sa di domina e wega segun e wega ta desaroya pa seya nan prome victoria. Venezuela ta pica bay ariba 2-0 den cabes di dos inning. Royal Power ta reacciona anotando 3 careda den bom di 2.

Venezuela ta rally den cabes di 3 inning haciendo e wega 5-3 na nan favor. Royal Power su motor ta calenta den bom di 3 inning y ta rally pa 10 careda a 'bataso limpio'. Venezuela ta menasa den ultimo turno na bate cu 3 careda mientras Royal Power ta bolbe rally pa 2 careda den bom di 5 inning pa asina knock out nan contrincante Venezuela ganando cu score di 18-8. Royal Power Tat Fat 18 careda, 18 hit, 1 error y ta laga 5 coreador na base. Venezuela 8 careda, 11 hit, 3 error y ta laga 4 coreador den circulacion.

Sendley Danies ta resulta pitcher ganador mientras Jo-

mark Flanegin ta pone un wega salba riba su number relevando Sendley den di 5 entrada. E veterano Joslin Falcon ta bay cas cu e derota mas un macutu di careda como regalo riba su number. Mihor bateador nan pa Royal Power a resulta Eldrick Dijkhoff y Aldrick "Charro" Loopstok ambos di 4-3, Gillian Wernet y Sendley Danies di 3-2, Yeify Tuly Silva di 2-2, Jomark Flanegin di 4-2 mientras cu Jerieel Rafael, Edmar "Macho" Tromp y Kenny Hart tur a bay di 2-1. Royal Power a bati como ekipo di 30-18 pa un averahe di 600 cu 2 triple y 2 doblete. Pa Venezuela a destaca na bate den causa perdi Luis Escara bay di 3-3, David Hernandez, Jhonatan Bustillo y Jose Garces tur a bay di 3-2, Jairo Prince di 2-1 y David Gotopo 1-1.

Diabierna, Diasabra y Dia Domingo awor Balls Out ta



continua riba veld di Centro di Bario Noord cu tremendo ambiente. Royal Power lo ta enfrentando e fuerte ekipo di Kudawecha Redskins Dia Domingo awor 145pm. Waak pa Bo tey!

Opinion ta un seccion di **Bon Dia Aruba** specialmente pa brinda oportunidad na lectoran individual pa expone nan opinion. Contenido publica di ningun manera ta refleha opinion di **Bon Dia Aruba** y ta pa responsabilidad exclusivo di e organizacion/individuo cu ta ofrece esaki pa publicacion. **Bon Dia Aruba** ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di **Bon Dia Aruba**.

OPINION



Skirbi pa Alfred Croes; Un Arubiano cu ta host riba Airbnb cu ta biba na Aruba Reaccion y remitido di un host di Airbnb na Aruba

Pa basta tempo caba mi a nota un campaña contra Airbnb y otronan similar. Prome ta cu pavia di Airbnb prijs di vivienda ta impagable, paso yen di stranhero ta cumpra cas na prijs halto, cual localnan no por paga.

Esey ta mercado liber capitalista, vraag en aanbod. Minister nan y parlamentario nan, boso kier yuda e habitante cu un bon prijs, ofrece boso cas na 100 mil. Despues ta e hecho cu Barcelona a prohibi Airbnb, wel elimina Papiamento y ban papia Catalan. Kier copia solamente loke ta cumbini esnan den e campaña contra Airbnb. Despues ta belasting. Esaki ta un problema cu belasting kantoor mester atende, no ta e competencia di esnan cu ta contra



Airbnb. Mi no ta wak ningun campaña pa presiona belasting kantoor pa paga bek miles di florin cu nos hendenan tin derecho di haya bek.

Ken ta beneficia di Airbnb? Corda, e mercado grandi di bishitante nan cu ta keda na Airbnb ta esnan di menos recurso, cual ami ta yama nan middle class. Prome ta aerolinia nan, paso un ticket di 500 dollar ta pa e pover, mid-

dle class y rico. Nan ta hayando hopi viahero extra door di e mercado aki. Un middle class dificilmente por paga 300 dollar pa anochi. Cortando Airbnb, e mercado aki lo desaparece.

Di dos ta e host nan cu ta haya algun cen di esaki, cual ta core den 80 pa 100 dollar pa anochi. Corda cu Airbnb no ta conta cu hardin, water front y otro "ameneties" cual

resort nan si tin. Un persona cu por paga 300 dollar pa anochi hamas lo keda na un Airbnb, e ta "below" su standard.

Otro tercera parti(nan) cu ta beneficia grandemente ta car rentals. Pa keda na un resort, un bishitante no mester huur auto. Pa un Airbnb, esey ta esencial, nan mester huur auto of gasta na taxi. Tambe supermercado nan, restaurant nan, incluso McDonalds y similar ta haya extra negoshi di e bishitante middle class nan aki. Otro cu sigur ta beneficia ta hardware store mane Kooyman, paso nos Airbnb mester tin calidad, no cualkier rancho. Mester upgrade cama, baño, tin awa cayente, airco y asina por sigi menshona. Elimina Airbnb lo elimina tur e esakinan tambe.

Expansion di camber y condominio. Esaki ta algo cu sigur ta y lo sigui afecta e "bottom line" di e resort nan. E grupo aki si tin efecto grandi riba nan, paso esnan cu ta den e grupo aki ta high class y nan si por paga facilmente 300 dollar pa anochi. E grupo di condominio aki t'ey caba ya no por haci nada mas. Sigur nan lo surpasa e cantidad di camber nan di Airbnb.

Preshon politico. Mi a wak den e dianan aki cu ta wordo bisa cu tin mas o menos 6000 Airbnb, tene cuenta cu e hende nan aki. Kita nan pan y nan lo recordabo na siguiente eleccion, cual ta 2 te 3 asiento. Ken realmente tin beneficio si Airbnb wordo prohibi of limita na Aruba?

Skirbi pa Drs Miranda y Drs. Tae Harte-Bareño

Ta hopi dificil pa drenta den awa na Boca Catalina

Apreciabel lesador, Mi casa cu mi ta 65 plussers cu ta gusta landa y snorkel. Jammer genoege nos mester bisa cu tin menos lugar unda nos por drenta y sali awa facil pa snorkel y landa.

Boca Catalina 2 (zie foto 01) ta un di nos lugar preferi, pero nos no por drenta y sali mas for di awa facil. Un grupo di turista a bin y tabata dificil pa nan drenta.

Nos kier a pidi boso ayudo cu e siguiente:

- Pa drecha e trapi unda bo ta baha riba e strand
- Kita e piedranan den awa pa tur hende por drenta



awa.

- Please pone vuilnisbakken. No tin ningun ey

banda. P'esey sushi ta acumula riba strand y den awa.



Chauffeur a pega soño, baha caminda y subi monton di piedra banda di caminda



Diadomingo mainta a drenta informe di un accidente cu hende herida riba Sasakiweg, mesora a dirigi tanto polis como ambulance na e sitio. Na yegada di e patruya a bin compronde cu probablemente e chauffeur cansa of pega soño a baha caminda na man drechi y a bay subi un monton di piedra riba otro y a resulta herida. Na prome instante polis a spanta ya cu e dama chauffeur no tabata responde. UN rato despues el a bin bij y na yegada di e ambulance nan a atende y transporte pa hospital.

Chauffeur a baha caminda, dal riba un “hydrant” y bolter di banda



Diahuebs anochi a drenta informe di un accidente cu hende herida riba e crusada di Mond Fierno, mesora a dirigi tanto polis, ambulance como tambe bombero. Na yegada di e patruya a bin compronde cu aki ta trata di un dama chauffeur cu tabata mancha e pick-up Baw a baha caminda dal riba un “hydrant” banda di caminda y e pick-up a kentel. Debi na e impacto e chauffeur a resulta herida. Debi na e sla riba e “hydrant” esaki a basha un monton di awa afo y a avisa W.E.B. di esaki. Na yegada di e ambulance nan a atende e dama y transporte pa hospital. Mientras bomberonan a corta e windshield pa logra corta e waya di bateria pa asina evita e auto pega na candela.

Accidente na e crusada Rudolf Arendsstraat cu Driemasterstraat cu basta daño material

Diadomingo atardi a drenta informe di un accidente na e crusada Rudolf Arendsstraat cu Driemasterstraat, mesora a dirigi un patruya na e sitio. un accidente pa falta di preferencia unda ambos auto no por a sigui core riba nan mes y mester a busca takelwagen pa hiba nan.

Na yegada di e patruya a bin compronde cu aki ta trata di Afortunadamente ningun hende a resulta herida.



Accidente pa falta di preferencia na e crusada na Hooiberg

Diasabra anochi a drenta informe di un accidente na e crusada di Hooiberg, mesora a dirigi un patruya na e sitio.

Na yegada di e patruya a bin compronde cu aki ta trata di un accidente pa falta di preferencia unda afortunadamente ningun hende a resulta herida.



Ambulance a bay warda di polis di Oranjestad pa un persona cu a bira malo



Diadomingo a drenta informe di cu un persona a bira malo na warda di polis na Oranjestad, mesora a dirigi un ambulance na e sitio.

Na yegada di e ambulance nan a atende e persona y a bisa cu no ta necesario pa hib'e hospital.

Hincamento dilanti di un club nocturno na Palm Beach



Dilanti di un club nocturno na Palm Beach, mesora a dirigi un patruya na e sitio.

Na yegada di e patruya a bin enkontra un persona herida

cu un hinca na su curpa y mesora a pidi pa ambulance. Mientras e ambulance no a yega polis mes a transporte cu urgencia den e patruya y a hib'e pa hospital.

Bringamento cu hincamento na un otro club nocturno na Palm Beach banda di hotelnan

Diadomingo madruga a drenta informe di un otro caso di bringamento cu hincamento na un otro club nocturno na Palm Beach banda di e hotelnan, mesora a dirigi tanto polis como ambulance na e sitio.

Na yegada di e patruya a señalá 2 sospechoso pero no tabata sigur cu nan lo tabata esunnan cu a hinca e victima pero asina mes a bay cu nan direccion di warda di polis na Shaba. Na yegada di e ambulance mesora a tuma e victima y a transporte pa hospital. Mientrastanto e hefe di recherche di distrito 2 (Shaba) tambe a presenta y a papia cu e victima kende a responde e recherche. Recherche tin e caso bao investigacion.



Polis a pidi ambulance pa un detenido cu kap na cabes deteni na warda di Shaba

Diadomingo mainta a drenta informe di cu na warda di Shaba tin un detenido herida cu un kap na cabes, mesora a dirigi un ambulance na e sitio.

Na yegada di e ambulance nan a atende e victima na warda y eyan a nota cu e victima mester bay hospital. Acompaña cu polis a hib'e hospital pa atencion medico avansa.



E declaracion di dividendbelasting awor ta den forma digital
Desde 4 di augustus 2025 disponibel den e portal "BO impuesto"

Siguiendo cu e trayecto di digitalisacion pa procesa declaracionnan y co-bransanan di impuesto mas eficientemente, Departamento di Impuesto ta sumamente satisfecho di por anuncia cu e formulario di declaracion di dividendbelasting ta disponibel den e portal digital "BO impuesto" (BOi). Esaki ta nifica cu desde awor e formulario aki lo por wordo entrega solamente den forma digital.

Disponibel dia 4 di augustus 2025
Digitalisacion di e declaracion di dividendbelasting ta un otro proyecto grandi, pa cual a instala un ekipo di profesionalnan di e departa-

mento cu ta trahando riba e proyecto aki desde aña pasa. Awor ta asina leu cu por anuncia cu e formulario di declaracion di dividendbelasting ta disponibel den e portal "BO impuesto" (BOi) entrante 4 di augustus 2025.

Esaki ta bira un logro tanto pa e departamento como e contribuyentenan di dividendbelasting, pasobra antes mester a procesa e formulari-onan den e forma tradicional. E contribuyentenan mester a yena nan datonan riba papel, despues saca copia y acudi na oficina principal pa entrega nan declaracion. Definitivamente awor tur e trabounan aki ta bira algo di pasado. E contribuyentenan di dividendbelasting ta entrega nan



declaracion for di nan oficina.

Declaracion

Un contribuyente di winstbelasting tin e deber di entrega e declaracion di dividendbelasting y haci e pago correspondiente dentro di 15 dia despues di pone e dividendo na disposicion di su accionistanan. Despues di drenta e portal por wak e folder "Dividendbelasting". Klik riba e folder aki pa yena e formulario di declaracion.

Di awor padilanti e contribuyentenan di dividendbelasting tin e obligacion di entrega e declaracion digital. Contribuyentenan lo no por uza e formulario di papel mas.

Autorisacion den BOi

Ta importante pa remarca, cu cada contribuyente (empresa) ta administrador principal di su account (belastingplichtige admin). E tin su propio number di usuario (username) y password. Pa preveni uzo indesea di su datonan di impuesto, ta importante pa nunca duna un tercera (un persona of consehero) e datonan pa log in den e portal.

Si e contribuyente (empresa) tin un consehero fiscal, e mester autorisa su consehero den e portal. Di e forma aki e consehero por haya e declaracion di dividendbelasting di su cliente na su disposicion pa atende cune. Acceso na e folder di dividendbelasting no ta sosode automaticamente.

Conseheronan fiscal cu ta registra como consehero na Departamento di Impuesto tin nan propio number di usuario y password y cu e credencialnan aki, nan por drenta den nan mesun portal y consulta e declaracionnan di nan clientenan. Ta consehabel pa pidi e clientenan pa autorisacion, pa asina haya acceso na e declaracion di dividendbelasting den BOi.

Departamento di Impuesto kier gradici su ekipo di funcionarionan publico cu ta traha incansablemente pa por facilita tur contribuyente pa nan por cumpli cu nan debernan di impuesto y den mesun rosea kier gradici cada contribuyente pa nan confiansa y cooperacion den trayectonan importante pa nos Pais.

Pa mas informacion encuanto e declaracion di dividendbelasting por manda un mail na onlinetaxservices@impuesto.aw.

Resultado Sorteo
Augustus 04

Cadena Alexander Lottery ta presenta resultado di weganan di suerte

DIARIO	KORSOU	SUPER4	FLAMINGO
6314	0066	0255	8097
7038	1119	SUPER5	6201
7400	7370	-	7132

MERDIA

Sorteo # 4701

6694

6861

1549

X2

Sorteo # 4701

2839

X2

Sorteo # 2757

2349

Sorteo # 4701

2585

Virgo

Sorteo # 1575

984

X2

Sorteo # 8613

4487

3197

3240

FP

Sorteo # 7657

9463

X2

Sorteo # 2362

0315

Sorteo # 6416

7680

Capricornio

Sorteo # 1346

386

X2

Sorteo #

0 x Jackpot

0 x Match 4+

0 x Match 4

0 x Afl. 12,00

Joker

Letter

Proximo Jackpot

340.000,-

Sorteo # 6907

0 x Jackpot

8 x Match 4

208 x Afl. 8,00

03-09-11-16-30

Proximo Jackpot

84.000,-

Sorteo #

0 x Jackpot

0 x match 4

0 x Afl. 500,00

0 x Afl. 50,00

0 x Afl. 15,00

Mega Ball

Proximo Jackpot

325.000,-

Afl. 485.000,-

Sorteo #


Departamento Arubiana ta
cera temporalmente debi na
vandalismo

Departamento Arubiana den Bachstraat ta informa cu lo cera te cu diahuebs awor.

E ciere aki ta debi na un incidente recién unda a mira resultado di vandalismo riba

e edificio di e departamentu. Den e proximo diano lo tuma tempo pa drecha e edificio y pues no por brinda servicio optimal. Diabierna e departamento lo habri su porta back pa publico.





Cas Di Cultura

Vondellaan 2 Aruba
297-582-1010

F A D A

Campanastraat 5 Aruba
297-583-2999
297-583-9610

F A V I

Primavera 233 Aruba
297-582-5051
297-582-5222

F E P O

Engelandstraat 15 Aruba
297-583-1016
297-583-6607

**Fundacion Contra
Violencia Relacional**
Tel: 583-5400

Fundacion Autismo Aruba

Irenestraat 21 Aruba
297-588-1179

Fundacion Pa Nos Muchanan

Cumana 2 Aruba
297-583-4247

Fundacion Tel Pa Hubentud

Wilhelminastraat 19
Aruba
297-588-6138

Koningin Wilhelmina Fonds

Spinozastraat 9 Aruba
297-582-0412

Mary Joan Foundation
Sabana Blanco 8 Aruba
297-588-9999

Rode Kruis Aruba

Pedro Gallegostraat 14
Tel. 297-582-2219
Fax 588-3376

Famia Planea (SBVO)

Avenida Milio J Croes 17
B Aruba
297-588-9591
www.famiaplanea.org
famiaplanea@hotmail.com

Stichting Fundacion Guia Mi

George Madurostraat 34
297-582-0088

Y M C A

Calbasstraat 1 Aruba
297-582-3072

AL-ANON group

Sabana Liber #8, Noord
(close to the hotels)
Tel: 736-2952 or
593-7081



Dokter na warda

Oranjestad San Nicolas
Hospital Imsan
7:00 pm / 10:00 pm **24 ora**

Botica na warda

Oranjestad: San Nicolas:
Sta. Anna : Seroe Preto:
Tel. 586 8181 Tel. 584 4833

EMERGENCIA 911

POLIS

Oranjestad	100
San Nicolas	104
Santa Cruz	105
Noord	107
Tip Line	11141
Brandweer	115
Ambulance	911
Hospital	527-4000
Imsan	524-8833
Warda Costa	913
Seguridad Nacional	11911
Cruz Cora	582-2219

BOTICA

Aloe	584-4606
4 Centro Medico	584-5794
Central	585-1965
Dakota	588-7364
Del Pueblo	582-1253
Eagle	587-9011
Kibrahacha	583-4908
Maria	585-8145
Di Servicio Noord	586-4606
Oduber	582-1780
Paradera	588-6638
San Lucas	584-5119
Santa Anna	586-8181
Santa Cruz	585-8028
Sero Preto	584-4833
Trupial	583-8560

UTILIDAD

Setar	117
Web	525-4600
Elmar	523-7147

FUNERARIA

Aurora	588-6699
Royal Funeral H.	586-4444
Ad Patres	584-2299
Olive Tree	584-8888

Servicio di Taxi

**Aruba Transfer Tour &
Taxi C.A.**
Tel: 582 2116 / 582 2010

Taxi Adres Services (24h)
Tel. 587 5900

A1 Taxi Services Aruba
Tel: 587-8850
Tel: 280-2828
Whatsapp: 592-7024

Enfrenta cu dificultad na cas

Ciudadanonan di Etiopia ta riesgo lamanan peligroso pa un miho bida

(AP) - E naufragio mortal cerca di Yemen su costa durante fin di siman tin un peso pisa riba e curason di varios na Etiopia. 12 migrante riba e boto cu tabata cargando 154 Etiope a sobrevivir e tragedia - por lo menos 68 a fayece y 74 te ainda ta desapareci.

Ora cu Solomon Gebremichael a tende tocante diadomingo su desaster, el a trece back recuerdonan doloroso - y el a perde un amigo cercano y ruman homber na migracion ilegal añanan atras. "Mi ta compronde e dolor demasiado bon," Gebremichael a bisa The Associated Press na su cas na Etiopia su capital, Addis Ababa.

Aunke Etiopia ta relativamente stabiel desde e guerra desde e pais su guerra den e region di Tigray a caba den 2022, desempleo di hobenan actualmente ta na mas di 20%, lagando varios ta core e riesgo di purba yega e paisnan di mas recurso di Golfo Arabe, buscando un miho bida otro caminda.

Mesel Kindeya a haci e biahe den 2016 via e mesun ruta den lama cu e boto cu a naufraga diadomingo, biahando sin papel den biahenan aregla pa contrabandistanan di Etiopia pa Saudi Arabia. "Di baina nos por a hala ro-



sea," e ta corda di su propio biahe. "Papia den contra di esaki por causa cu e contrabandistanan lo tira nos for di e boto. Mi ta lamenta hopi cu mi a pone mi bida den peligro, pensando cu esaki lo mehora mi situacion."

Kindeya a logra yega Saudi Arabia y a traha como un werkster pa 6 luna, prome cu el a keda captura pa autoridadnan y deteni pa 8 luna. Pa ora cu el a yega Etiopia back, e no a logra spaar back loke el a gasta inicialmente pa su biahe.

"A pesar di dificultad den bida, inmigracion ilegal no ta un solucion," el a declara.

Durante e ultimo añanan, centenares di migrante a fayece den naufragio na Yemen, e mundo Arabe su pais mas pover cu ta trapa den un guerra civil desde september di 2014. "Esaki ta demostra e desesperacion di e situacion na Etiopia pa varios hende," segun Teklemichael Ab Sahlemariam, un abogado di

derechonan humano cu ta traha na Addis Ababa. "Nan ta pusha pa enfrenta un pais yen di Guerra manera Yemen y bay Saudi Arabia of Europa," el a bisa AP. "Mi sa di varios cu a perde nan bida."

Y varios di esnan cu keda gara y manda back na Etiopia ta purba bolbe crusa. "Hende ta keda bay back, hasta ora nan keda deporta, enfrentando extorsion financiero y suheta na explotacion sexual," e abogado a bisa.

Etiopia su ministerio di Exterior a bisa den un declaracion dialuna cu ta urgi e ciudadanonan "usa vianan legal ora di yega na oportunidadnan."

Vocero di e African Union Nuur Mohamud Sheek a haci yamado pa accion colectivo urgente riba un publicacion di rednan social pa "combati e causa di migracion iregular y mantene e derechonan di migrante y preveni perdida di bida mas adelante."

Israel ta pone crocodil drumi despues di varios escape y trato inhumano

(AP) - Un cantidad di crocodil hiba un campo Israeli na West Bank decada atras a yega fin di nan bida, cu autoridadnan poniendo nan drumi despues di varios aña di escape ripiti a causa di negligencia.

Autoridadnan di Israel a bisa dialuna cu veterinario di e gobierno a pone e crocodilnan drumi pa motibo cu nan ta menasa e area su residen-tenan y nan mes tabata sufrir a causa di trato inhumano. E cantidad exacto di crocodil cu a pone drumi y e metodo cu cual a haci esaki no tabata inmediatamente cla.

"E crocodilnan di Nile tabata na un sitio bandona cu mal condicion y esaki ta constitui abuso di bestia, cu acceso



insuficiente na cuminda, cual a causa cu nan a cuminsa tin comportamiento canibal," COGAT, e cuerpo di defensa di Israel cu ta mancha asun-tonan civil na West Bank a bisa.

E crocodilnan inicialmente a ser hiba e pueblo Petzael como un atraccion di turista - un idea di negoshi cu violencia entre Israel y Palestionnan den West Bank a stroba. Despues nan a ser cumpra pa un negociante cu tabatin

speransa di bende nan cuero. Nan destino ta un pregunta sin contesta desde cu Israel a aproba un ley den 2012 cu a clasifica nan como bestia proteha y a prohibi cria nan pa benta como carni of merchandise.

"Mi no kier ni pensa kico lo pasa si un di nan logra scapa y yega e Riu Jordan, y despues nos lo tin un incidente internacional," hefe di e comunidad local a conta The Associated Press den 2018.

Aurora

Royal Pray

Funeral Home & Crematory

“Bou di alanan di Dios mi ta sigur”
Abo ku ta biba bou di amparo di Altisimo, ta
hospeda den sombra di Dios Omnipotente, bisa
Señor:
“Mi refugio, mi forti, mi Dios, den kende mi ta
pone mi konfiansa”
Salmo 91:1-2

**Cu dolor na nos curason, nos ta participa
fayecimento di nos ser stima:**



Michael Florentino Gomez
**Cariñosamente yama “Kito, Maik, Chef
Michael”**
*10-10-1965 - †02-08-2025

Acto di entierro lo wordo anuncia despues

Aurora

Royal Pray

Funeral Home & Crematory

“Dios ta amor... y amor ta Dios,
maske mi no ta na e mundo aki, tur dia lo
mi ta banda
di boso Curazon, mi por stens di loke
Señor ta hasi”
Salmo 33

**Cu dolor na nos curason, nos ta participa
fayecimento di:**



**Sra. vda. Isidora Koolman-
Hernandez**
Cariñosamente yama “Dora”
*03-01-1941 - †01-08-2025

**Acto di entierro lo wordo anuncia
despues**

OLIVE TREE

FUNERAL CARE & CREMATORY

PIEDRA PLAT

SANICOLAS

(+297) 582 - 0000 (24h) (+297) 584 - 8888 (24h)
(+297) 630 - 5472 (24h) (+297) 567 - 0862 (24h)

**“Señor ta mi Wardador, mi’n tin falta di nada; Den
kunuku di yerba berde, E ta pone mi sosega.
E ta hiba mi na awa trankil, pa mi bolbe haña forsa. E ta
guiami den caminda drechi fiel na su nomber.” Salmo 23**

**Cu dolor na nos curason, pero conforme cu Dios su
boluntad, nos ta anuncia fayecimento di nos ruman,
omo y amigo,**



Sr. Bienvenido Gomez

Miho conoci como “Bien”, ex bendedo di Biljetjie y Lotto
*27-05-1945-†24-07-2025

Mayornan :

† Ramon Emilio Gomez (barbero)
† Elena Ramona Lugo de Gomez

Na nomber di su Rumanan :

Vda. Martalina Gomez de Lugo (Venezuela) y famia
† Julio Cesar y Dana Gomez Rodriguez (USA) y famia
† Louis Joaquin Gomez y famia
Emilio Ernesto Gomez y famia
† Mariano Andris Gomez y famia
Vda. Anadilia Kock Gomez y famia
Rina y Jack Knaap Gomez (Hulanda) y famia
Carmen Patricia Gomez (Hulanda) y famia
Sergio (Papi) y Omaira Gomez Franken y famia
Santiago (Gito) y Madeleine Gomez Ras y famia

**Subrino(a) nan y sobresobrini (a) nan, tanta y omonan,
primo y primanan y tur su amigonan di Playa y
conocirnan di Playa.**

**Un danki special ta bai pa Staff y Personal di Huize
Maristella pa nan bon cuido.**

Demas Famianan: Gomez, Lugo, Rodriguez, Solognier,
Geerman, Gonzalez, Maduro, Tromp, Kock, Nadall,
Knaap, Schotborg, Franken, Ras.

**Ta invita pa Acto di condolencia y despedida di nos
ruman stima Bien cual lo tuma lugar: Diamars 5 augustus
2025, di 2or pm pa 4or pm na Misa Pro Catedral San
Francisco di Asis na Playa y despues lo sali pa Santana
Sabana Basora.**

**Nos ta pidi disculpa si den nos momento di tristeza nos
por a lubida di menciona algun nomber di famia.**

**Nos ta lamenta cu despues di entierro nos lo no ricibi
bishita di condolencia na cas.**



Caribbean Speed Printers N.V.

Ta anuncia fayecimento di



Sra. Dulce H.V. Dirks

Na bida ruman di nos colega
Sr. Francis Dirks, helper di Press Dpto.

Na nomber di staff y personal di Caribbean Speed Printers N.V.
nos ta manda palabra di sincero condolencia y hopi forsa na nos colega
Sr. Francis Dirks y famia

Cu Sra. Dulce sosega na paz.

Aurora

Royal Pray

Funeral Home & Crematory

“Señor ta mi wardador, mi’n tin falta di nada.
Den cunucu di yerbe berde e ta ponemi sosega.
E ta hibami na awa trankil,
pa mi bolbe haña forsa.” Salmo 23

Cu honda pena pero conforme cu boluntad di Dios, nos tin e tristo deber di anuncia e fayecimento di nos casa, tata, welo y ruman stima:



Thomas Primitivo Tromp
mihor conosi como:” Johnny Tromp, Mayor
Johnny Tromp Polis of Delegá ”
*16 september 1948 † 26 juli 2025

Na number di su
Casa: Yasira Navas Zambrano

Yuinan: Marc Tromp y Sra. Darcy Soemers
Igmarr Tromp y Carlo Althof
Carlene Tromp y Robert Danjo
Luigi Arends
Youraine Koolman-Hernandez y Jonathan Koolman
Quincy Tromp
Emma Ainhara Tromp

Rumannan: Tito y Sra Aida Tromp-Geerman
Tirso y Sra Mary Tromp-Comenencia
Jimmy y Sra Judith Tromp-Maduro
Albertico Tromp y famia
Iraida Tromp

Nietonan: Marcus, Juselah, Thomas, Ishmar, I-Damar,
I-Jolyne, Zayn Tromp
Caelen y Caclie Danjo

Sobrino y Sobrinanan: Alvin, George, Enaumberta, Tamara,
Milagro, Elton, Thirza, Gabriela, Jennyline, Joshua (iha), Archi,
D’angelo, Danilo, Iraiza, Jean Pierre, Jeantella, Julia, Julian, Joja

Commer y compernan: Dilsa Cueto, Hendrit Gomez y Henry Luna

Primo, primanan, y demas famianan: Tromp, Martis, Danies,
Navas, Giel, Geerman, Koolman, Comenencia, Maduro,
Jacobs, Donata, Zievinger, Klepper, Penso, Gomez, Winterdaal,
Milano, Rodriguez do Valle, Hieroms, van der Biezen, Erasmus,
Ridderstaat, de Cuba, Faro, Ruiz, Kelly, Chow, Toussaint, Croes,
Danjo, Mac-Jannet y demas famia na Hulanda y Corsow.

Adres pa condolencia: Aurora Funeral Home, diamars 5 augustus
2025 di 7or pa 9or di anochi.

Ta invita tur famia, amigo, bisiaña, conosir y ex-coleganan di
Korps Politie Aruba pa asisti na e acto di entiero cu lo tuma lugar
diaranson 6 augustus 2025 na Pro-Cathedral San Francisco na
Playa di 2or pa 4or.

Despues di entiero no ta ricibi bishita di condolencia na cas.

Nos disculpa si den nos tristesa nos a lubida di menciona un of
otro famia.

Aurora

Royal Pray

Funeral Home & Crematory

“Señor ta mi wardador, mi’n tin falta di nada.
Den cunucu di yerba berde e ta ponemi sosega.
E ta hibami na awa trankil,
pa mi bolbe haña forsa”.

Salmo: 23

Nos ta anuncia fayecimiento di:



Gregorio Ramiro Croeze
Mihor conosi como “Doque”, “Romi”, of
Boggie”

*Maart 12, 1953 – †Augustus 2, 2025
Na bida propetario di Urataka Center- Best
Pizza,

Cofundador y miembro di Mustang Club
Aruba, Cofundador y miembro di Croeze
Brothers Racing, miembro di Classic Car
Club y miembro di TTT Motorcycle Club.

Na number di su:
Querido esposa:
Jacky Croeze- Ras
Yiu nan:
Gregory Croeze y Sharlyze Romano
Rigo Croeze
Manera un Yiu:
Jessie Kamidi-Rasmijn
Unico nieta stima:
Amelia Croeze
Suegra stima:
Maria Antonia Ras
Ruman nan:
†Chia Croeze y famia
†Chico Croeze y famia
†Cita Acosta-Croeze y famia
†Quita Croes-Croeze
†Djol Croeze y famia
†Poy Croeze y famia
Rina Solognier y famia
†Milo Croeze y famia
Rica Croeze
Dolfito Croeze y famia
Primo y prima nan, sobrino y sobrina nan, amigo y amiga
nan y demas famia.
Iha nan: Omar Acosta, Donovan Maduro, Glenrick Croes,
Andrea Croeze.
Amigo nan:

Frenk Lacle, Kedi Koolman, Ricky Semeleer, Olie Danje,
Dennis Arends, Alex Mansur, Esi Werleman, Theo de Jong,
Shaniro Kelly, Pedro Teixeira, Indira Ras, Alex Krozendijk,
Dito de Kort, Hubert Solagnier, Karel Jeandor, Ton Rojer,
Aguiles Winklaar y hopi mas.
Na ful e famia, colega nan y ex colega nan di Urataka Center.
Na su ex colega nan di Concorde Casino
Na tur su bon bisiaña nan
Un danki na Dr. Franca, Dr. Waterloo, Dr. Monica Nuboer,
oncologo nan, Dr. Vis, Sra. Lola Geerman di Wilhelmina
Kanker Fonds y tur e enfermero nan di Horacio Oduber
Hospital, especialmente esnan di A4
Y demas famia nan: Croeze, Ras, Romano, Acosta, Solognier,
de Cuba, Werleman, Bikker, Croes y hopi mas.
Dispensa si den nos tristesa nos por a lubida un of otro
persona.

Oportunidad pa condolencia: diaranson 6 di Augustus 2025
di 6’or pa 9’or di anochi na Aurora Funeral Home.
Ta invita pa e acto di despedida cu lo tuma lugar diahuebs 7
di Augustus di 9’or pa 11’or di mainta na Misa Immaculata
Concepcion na Santa Cruz sigui pa e acto di cremacion cu lo
tuma lugar den seno familiar.
Enbes di manda flor y/of krans nos lo aprecia donacion na
Wilhelmina Kanker Fonds
Nos ta lamenta cu despues di despedida nos no por ricibi
bishita di condolencia na cas.

Aurora

Royal Pray

Funeral Home & Crematory

“Dios ta amor... y amor ta Dios,
maske mi no ta na e mundo aki, tur dia lo mi ta banda
di boso Curazon, mi por stens di loke Señor ta hasi”
Salmo 33

Cu dolor na nos curason, nos ta anuncia fayecimento
di:

Johanna Teresa Brete
- Lioe-A-Tjam
Cariñosamente yama
“Nana of Tanti”
*14-10-1935 - †01-08-
2025



Acto di entiero
lo wordo anuncia
despues

Aurora

Royal Pray

Funeral Home & Crematory

“Señor ta mi wardador, mi’n tin falta di nada.
Den cunucu di yerba berde e ta ponemi sosega.
E ta hibami na awa trankil,
pa mi bolbe haña forsa”.

Salmo: 23

Cu dolor na nos curason, nos ta participa fayecimento di
nos ser stima:

Sra. Juana
Semerel
Cariñosamente
yama “Oma”
*08-02-1930 - †31-
07-2025



Acto di entiero lo
wordo anuncia
despues

Aurora

Royal Pray

Funeral Home & Crematory

Don Pedro
Marco Ismaël
Bareño
Ihor conoci
como:” Pedro,
Opa, Padushi,
Momal of Mr.
Bareño”

*07-10-1939
†02-08-2025



Acto di entiero lo
wordo anuncia
despues.

Yerb’i cunucu ta berde,
Seronan bisti di fiesta,
Cunucu ta cubri ku carne,
Vaye tapa cu maishi.
Tur ta grita, Si, ta canta di alegria
Salmo 65:12,14

A fayese cristianamente nos tata, welo, swa y omo stima:



Ocho persona, incluyendo misionario Irlandes, desaparecido despues cu hombernan arma ta invadi orfanato na Haiti

(AP) — Ocho persona incluyendo un misionario Irlandes y un mucha di 3 aña ta desaparecido for di dialuna despues cu hombernan arma a invadi un weeshuis na Haiti, e atake mas recien den un area controla pa un colecta poderoso di gang arma.

Autoridadnan den pura tabata busca decenas di mucha y personal di e orfanato Saint-Helene mancha pa Nos Petits Freres et Soeurs, un caridad internacional cu oficina na Mexico y Francia. E orfanato ta cuida mas di 240 mucha, segun su website.

Entre esnan secuestra diadomingo trempa, tabata Gena Heraty, un misionario Irlandes cu a traha na Haiti desde 1993, y a supervisa e programa di necesidad special pa mucha y adulto na e orfanato. Na 2013 el a keda ataca ora sospechosonan a invadi e orfanato y a mata su colega, segun medionan Irlandes.

Su famia a emiti un declaracion bisando cu nan tabata “absolutamente devasta” pa e secuestro diadomingo. “E situacion ta evolucionando



y ta profundamente preocupante.”

Diadomingo a marca e secuestro di perfil halto mas recien involucrando un misionario stranhero. Na 2021, e gang 400 Mawozo a secuestra 17 misionario, incluyendo cinco mucha, for di un organisacion basa na Merca na Ganthier, oriente di e capital, Port-au-Prince. Mayoria a keda secuestra pa 61 dia.

E secuestro diadomingo a tuma lugar na Kenscoff, antes un comunicacion pacifico den area metropolitano di Port-au-Prince. Porta di e orfanato a keda cera dialuna mientras Instituto di Bienesar Social y

Investigacion di Haiti a traha cu UNICEF pa identifica sitionan unda por reubica mucha y empleado.

Ningun persona a declara responsabilidad pa e secuestro, den un area controla pa un federacion di gang conoci como Viv Ansanm. Merca e aña aki a design'e como un organizacion terrorista stranhero.

Simon Harris, vice-prome minister di Irlanda, a bisa den un declaracion cu e secuestro di Heraty y e otro nan tabata “profundamente preocupante” y a haci un yamado pa nan liberacion inmediato.



Den un entrevista den pasado cu corant Irish Independent, Heraty a recorda cu el a ser menasa cu morto ora sospechosonan a invadi e orfanato na 2013.

“Nan tabata hopi agresivo. Un tabatin un martiu, un tabatin un arma di candela,” el a bisa. Heraty a bisa cu su colega a ser mata cu un martiu despues cu el a core pa yuda y e otro nan.

Ultimo lugar cu bo lo spera un morto violento pa sucede na Haiti lo ta den un cas cu hende cu necesidadnan spe-

cial,” el a bisa. “Bida djis no ta husto. Nos sa esey. Nos mester acept'e.”

Al menos 175 persona na Haiti a keda reporta como secuestra di april te fin di juni e aña aki, cu 37 porciento di e casonan aki tumando lugar na Port-au-Prince.

Nacionnan uni a bisa cu mayoria di e secuestronan aki a ser culpa riba e gangnan Grand Ravine y Village de Dieu, cu ta forma parti di e federacion Viv Ansanm.

UN ta bisa cu 68 migrante Africano a muri ora un boto a naufraga cerca di Yemen

(AP)—Un boto a naufraga diadomingo den lama for di costa di Yemen, y a laga 68 migrantenan Africano morto y 74 desapareci, segun e agencia di migracion di Nacionnan Uni (UN). E tragedia aki ta e mas recien den un serie di naufragio cerca di Yemen cu a mata centenares di migrantenan Africano cu tabata huyendo di conflicto y pobreza cu e speransa di yega na e paisnan rico di e Golfo Arabe.

Abdusattor Esoev, cabes di e Organizacion Internacional pa Migracion na Yemen, a bisa e presa asocia cu e boto, cu 154 migrantenan Etiope abordo, a naufraga den e Golfo di Aden cerca di e provincia sur di Yemen Abyan trempa riba diadomingo. El a bisa cu 54 curpanan di migrantenan a yega na costa den e distrito di Khanfar, y 14 otro a ser haya morto y a ser hiba na un morgue di hospital na Zinjibar, capital di Abyan na

costa sur di Yemen.

Segun Esoev, solamente 12 migrantenan a sobrevivi e naufragio, y e resto ta desapareci y ta considera morto. Den un declaracion, e director di seguridad di Abyan a describi un operacion di buskeda y rescate masivo debi na e gran cantidad di migrantenan morto y desapareci. El a bisa cu a haya hopi culpa apareci na un area amplio di e costa.

A pesar di mas cu un decada di guera civil, Yemen ta un ruta principal pa migrantenan di East Africa y Horn of Africa cu ta purba yega na e paisnan di e Golfo Arabe pa traha. Traficante ta transporta migrantenan den botonan cu hopi bes ta peligroso y cu un abundancia di hende, cruzando Lama Cora of Golfo di Aden.

Segun IOM, centenares di migrante a muri of a disparce den naufragio cerca di Yemen

den e lunanan recien, incluyendo na maart cu dos migrantenan a muri y 186 otro a disparce despues cu cuater boto a naufraga cerca di Ye-

men y Djibouti.

Segun un informe di IOM na maart, mas cu 60.000 migrante a yega na Yemen na

2024, un reduccion for di 97,200 na 2023, probablemente debi na mas patruyahe den e lamanan.



Departamento di Estado por existi applicantenan di visa paga un deposito di te hasta \$15.000 pa drenta Merca

(AP) — Departamento di Estado ta propone pa esnan cu ta aplica pa visa di negoshi of turismo tin cu paga un deposito te \$15.000 pa por drenta Merca — un medida cu por haci e proceso demasiado caro pa hopi hende.

Den un notificacion cu lo ser publica awe riba e Federal Register, e departamento a bisa cu lo inicia un programa piloto pa 12 luna den cual personanan for di otro pais considera cu tin un tasa halto di sobre estadia y falta di control interno riba seguridad di documentonan por ser obliga pa paga un deposito di \$5.000, \$10.000 of \$15.000 ora nan aplica pa un visa.

E propuesta ta parti di un serie di medidanan cu e administracion di Trump ta tuma pa pone mas condicion pa applicantenan pa visa. Siman pasa, e Departamento di Estado a anuncia cu hopi aplicante pa renobacion di visa lo tin cu haci un entrevista presencial adicional — un requisito cu no tabata existi prome. Ademas,



e departamento ta propone pa applicantenan pa e programa di Loteria di Diversidad pa Visa tin paspoort valido for di nan pais di nacionalidad.

Un version preliminar di e notificacion riba e deposito, cu tabata disponible dialuna riba e website di Federal Register, a bisa cu e programa piloto lo tuma vigor den 15 dia despues di su publicacion ofi-

cial y ta necesario pa sigura cu gobierno Mericano no keda financieramente responsable si un bishitante no cumpli cu e condicionnan di su visa.

“Stranheronan cu ta aplica pa visa como bishitantenan temporal pa motibo di negoshi of recreacion y cu ta ciudadano di paisnan identifica pa e departamento di tin un tasa

halto di sobre-estadia, unda e informacion pa investigacion y verificacion ta deficiente, of paisnan cu ta ofrece ciudadanía pa inversion sin requisito di residencia, por ta suheto na e programa piloto,” e notificacion ta bisa.

Lista di paisnan afecta lo ser publica ora e programa yega na vigor, segun e notificacion.

E deposito por ser anula dependiendo e circunstancianan individual di cada aplicante.

E deposito no ta aplica na ciudadanonan di paisnan cu ta participa den e Visa Waiver Program, cual ta permiti bishita pa negoshi of turismo pa un maximo di 90 dia. mayoria di e 42 paisnan cu ta participa den e programa ta den Europa, y otro den Asia, Medio Oriente y otro regionnan.

Deposito pa visa a ser proponi den pasado, pero nunca implementa. E Departamento di Estado tradicionalmente a descurasha e requisito aki pa motibo cu e proceso pa pone y libera un deposito ta complicado, y pa posible mal comprension di parti di e publico.

Sinembargo, e departamento a agrega cu esey “no ta basa riba ningun ehempel of prueba recien, pasobra deposito pa visa generalmente no a ser existi den e ultimo temponan.”

Gobierno Israeli ta vota pa rechasa Procurador General

Escalando enfrentamento cu hudiciario



(AP) — Gabinete Israeli dialuna a vota unanimamente pa duna retiro na Procurador General, escalando un enfrentamento largo entre prome minister Benjamin Netanyahu y e hudiciario, cu criticonan ta mira como un menasa na e institucionnan democratico di e pais.

Corte Supremo a freeze e decision mientras ta considera su legalidad.

Netanyahu y su sostenedornan ta acusa

Procurador General, Gali Baharav-Miara di excede su podernan door di blokea decisionnan di e gobierno electo, incluyendo un movida pa duna retiro na e cabesante di e agencia di seguridad domestico di Israel, otro oficina ostensiblemente no politico. Baharav-Miara a bisa cu tin un conflicto di interes pasobra Netanyahu y varios ex-ayudantenan ta enfrenta un serie di investigacion criminal.

Criticonan ta acusa Netanyahu, kende ta den huicio pa corrupcion, di mina independencia hudicial y



busca pa concentra poder den mannan di su gobierno di coalicion, esun mas nacionalista y religioso den historia di Israel. Netanyahu ta rechasa e acusacionnan y ta bisa cu e ta victima di un ‘witch hunt’ di oficialnan hudicial hostile, reforsa pa medionan di comunicacion.

Un intento di gobierno di Netanyahu pa reforma e hudiciario na 2023 a genera lunas di protesta masivo, y hopi ta kere cu a debilita e pais

despues di e atake di Hamas dia 8 di october despues e aña ey, cu a marca e inicio di e guerra na Gaza.

E Movimiento pa Gobierno di Calidad na Israel, un grupo vigilante prominente, a bisa cu a entrega un peticion di emergencia cu Corte Supremo despues di e voto dialuna. A bisa cu mas cu 15mil ciudadano a uni e peticion, yamando e retiro “ilegal” y “sin precedente”.

Den un declaracion, e grupo a acusa gobierno di cambia proceduranan di retiro solamente despues di faya di retira Baharav-Miara legalmente bao di e reglanan existente. Tambe a cita un conflicto di interes relaciona cu e huicio andando contra Netanyahu.

“E decision aki ta converti e rol di Procurador General den un nombramento politico,” e grupo a bisa. “E bataya legal ta bay continua te cu reverti e decision robes aki.”